

DE TOTO EO 12

POEMATIS GENERE,

QVOD EPIGRAMMA

VVLGO DICITVR,

ET DE IIS, QVAE AD

*illud pertinent, Libellus.*



THOMA CORRAEA AVCTORE.



VENETIIS,

Ex officina Francisci Ziletti. 1 5 6 9.

DE TOTO BO

FORMATIS GENEAL

OVOD EPICRAMMA

ALFRED DILLER

AT DE 11

ALFRED DILLER

THOMAS CORRECTION



ALFRED DILLER

ALFRED DILLER

3  
POTENTISSIMVM

D. SEBASTIANVM

Primum Regem Lusitaniæ &c,

THOMAS CORRAEA.



PRINCEPS ingenij, & doctrinae Plato in quinto de rep. felices uocat eas resp. in quibus aut philosophi ad clauum imperij sedent, aut qui gubernacula regni tractant, philosophantur: nec iniuria: cum enim a sapientia tanquam a fonte promanet non modo bene uiuendi ratio, sed etiam honeste, & laudabiliter regendi remp. consilium, & administratio: hominis autem felicitas hac imbecillitate naturæ, & hac mole corporis detenti in eo sita sit, ut honesta, & turpia distinguat, quid expetendum, quid fugiendum sit, cognoscat, secundum eam cognitionem omnes actiones in uita, functionesq; humanas accommodet, (quoniam ad has duas res natum esse ui-

ri sapientes censuerunt) recte diuinus ille philosophus aut litteratis amandandam esse remp. aut ijs qui litteras colant, oportere iudicauit, ut res omnes secundas adipiscerentur. cum enim nihil in rerum natura sit homini utilius sapientia, nihil ex rebus omnibus humanis praestantius doctrina, planum sane est, nihil etiam esse laudabilius docto, & litterato principe, cuius uitam doctrina informet, ipse totius regni mores componat. Est doctrina in quouis amanda, est utilis, est laude digna; sed non eodem modo in uiro principe, & qui munia publica obeat, atque eo qui se se abdat cum Musis, & intra priuatos parietes cognitionem omnem pertractet. Interest enim per multum inter litteratum principem, & doctum priuatum quempiam uirum. Nam si quis reperiatur humili, & obscuro loco natus, qui scientijs omnibus animum excoluerit, omni uirtutum cohorte sit septus, ornamentis quibusuis ornatus, non tamen eas uirtutes in utilitatem omnium conferre, non eodem modo exercere potest, ut uir princeps. Et si enim tam optimatibus & principibus, quam tenuibus, & abiectis hominibus sit commune scientiae ornamentum: non tamen actio, & functio scientiae informata ex aequo utriusque conuenit

conuenit. Actio enim uirtutum non cadit in quemuis, non conuenit iustitiae moderatio cui-  
 cunq; non liberalitatis, non temperantiae. Cam-  
 pus sit necesse est, in quo euagentur, & excur-  
 rant functiones uirtutum. Sint oportet, quibus  
 imperare possis, ut congruenter iustitiae placitis  
 instituas tuas actiones. Sit quod des, desideratur,  
 ut liberalitatem colas: nec illa occasio cuiuis, nec  
 haec facultas datur, ut in officio esse, & tueri tuas  
 partes possis. Formamur omnes a natura ad haec  
 praestanda: fingimur ut quae laudabilia sunt, seque-  
 mur sponte nostra ea quoniam non est integris  
 uiribus, sed deprauata, & infirma praecceptis in-  
 stituimur, ut uoluntatem confirmet ratio, & in  
 eam inducat uiam, qua recta ad omnem itur glo-  
 riam. Haec si quis habeat, fortunatum eum ego  
 appellabo, atque eo magis, si huc accesserit, ut  
 affluat fortunae commodis: non quod ad beate  
 uiuendum praesidij ego ponam aliquid in bonis  
 externis. Sic enim uiri consilio, & ingenio prae-  
 stantes statuunt, uirtutem primum esse bonum,  
 & per se expetendam in uita, non alterius boni  
 causa quaerendam. Nam qui uirtutem exquirat  
 diuitiarum, aut honorum gratia, is nunquam per-  
 fectam laudem adipiscetur. Si uero ipsa merito  
 suo

suo per se se appetatur, diligatur, sit in pretio;  
 eam sane ueram laudem appetenti afferre potest.  
 Hunc Deus praeter ceteros amasse uidetur, cui  
 eam mentem dederit, ut praeter ceteros saperet;  
 Hic nomen suum uindicat a tenebris, exemit ex  
 obliuione, immortalitati consecrat. Hic est ex  
 eo genere Heros, quē ardens euexit ad aethera  
 uirtus. Domi uobis Sebastiane Rex potentissi-  
 me, domi nascitur ista laus, nec foras petenda est  
 insignis haec, & excellens gloria. Hoc patrimo-  
 nium ceteris amplissimis haereditatibus Reges  
 Lusitaniae maiores tui Regiae familiae uestrae  
 adiungendū putarunt. cui si unquam merito laus  
 ista tota debetur, debetur sane uni tibi Sebastia-  
 ne Rex maxime, & debetur iure tuo. Cum enim  
 tibi ad opes quas tibi summus Deus est elargitus  
 amplissimas, non modo in Lusitania tua sed in bo-  
 na Mauritaniae Aethiopiae, Americae parte, in  
 amplissimis Indiae regnis, in ultimis orbis termi-  
 nis tuis imperijs regiones subiecerit, prope infi-  
 nitas, nihil fere possit accedere, nihil ad maiesta-  
 tem regiam, quem Reges potentissimi plerique  
 ut principem suscipiant, & colant; ut dominum  
 obseruent, & uenerentur, & ut amicum diligant,  
 nihil huiusmodi tamen magni faciendum esse pu-  
 tasti;

casti; si solida uirtute destitueretur. Virtutis amore inflammatus iam inde a tenera aetate totum te studijs bonis consecrasti: ut qui pulchritudinem uirtutis cernerēs animo, nec aliud in uita magnopere expetendum duceres. Tantum studio effecisti, & industria, ut quasi regiae maiestatis oblitus, indagandam tibi doctrinam labore & ingenio honestissimum iudicares. Et prima aetate eam imbiberes sapientiā, quae in omni uita tibi comes, regnis tuis esse & futura modetratrix. Itaque quod alij multorum annorum curriculo uix consequuntur, tandem tu natus decimum quartum annum es adeptus; ut & Latinam linguam teneas optime, calleas componendi carmina rationem, in ceteris disciplinis non sis rudis, in mathematicis uero & cum ingenio, nec sine industria uerferis. Assequeris Rex maxime hoc tuo studio uel illud, ut cum omnium regum sis nobilissimus, omnium ad uirtutem accommodatissimus, quorum alterum maiorum tuorum maximis in rebus testata uirtus declarat: alterum tuo Marte comparaueris, ut natura tua nata ad omnem uirtutem, & facta uideatur: Sis idem & habearis omnium doctissimus. Quae laus ceteris tuis praeconijs meo iudicio est anteponenda.

Doctrinam



Doctrinam cum dico, uirtutis intelligo comitem,  
& administram, nec a uirtute separo sapientiam.  
Hanc te quia consecutum iam, aut consecuturum  
spero assiduo isto audiendi & legendi studio, bo-  
na omnia adeptum esse diuina in humana uita exi-  
stimo. Tu Sebastiane Rex maxime gaude tuo  
isto immortali bono, fruiere, communica cum  
tuis, ut eos etiam felicitate tua efficias felices.  
Nam ita est natura comparatum, ut omnes in Re-  
gis, & Principis uitam tanquam in speculum intuea-  
mur: in eius uitae institutum oculos conijciamus,  
& ad illius similitudinem actiones nostras, & ra-  
tionem uiuendi fingamus, & formemus. Rex si  
fit ad arma propensus; studium armorum ample-  
ctuntur omnes, & in eo uigilant, laborant, con-  
tendunt; excellere enituntur, in quo regem ani-  
matum esse animaduertunt. Idem si litteras a-  
met, litterarum sequuntur omnes exercitatio-  
nem, & ad uirtutem comparandam sese compo-  
nunt. Illud maiores tui reges superiores Lusita-  
niae aperte doctuerunt re ipsa: hoc auus tuus Ioan-  
nes tertius immortalitate dignissimus annis elap-  
sis non obscure ostendit erecto locis pluribus,  
magnis impensis, litterarum gymnasio, conuoca-  
tis, magnis suis sumptibus, doctoribus cuiusque fa-  
cultatis



cultatis insignioribus. Armorum studium & si Lusitanae genti cum multis alijs nationib. erat commune, cesserunt tamen Lusitanis Ducibus magni quondam Imperatores, ut illae scriptis celebratae laudes indicant, ut illa arma quae summum ferocissimis nationibus terrorem metumque incusserunt declarant, ut clara & exornata trophoea illustrium uictoriarum insignia, ut fixa in disjunctissimis terrarum oris monumenta praedicant, ut pleraque regna multis saeculis ne de nomine nota nostra tempestate tuorum maiorum diligentia, & tua ita classibus patent, ut ea loca ad quae facilis, & quotidiana est transmissio. Litterarum laudem & doctrinae sibi aliae nationes uindicabant, uix ut nationes exterae fieri posse putarent, ut Lusitanus homo clarus in genere aliquo doctrinae euaderet, nec illi posse contingere ut Romanam ciuitatem furari, aut in tabulas irrepere unquam politionis litteraturae existimarent. Sed tantum potuit singularis tui liberalitas, & beneficentia, ut breui tempore tantam lucem maxima Lusitano nomini doctrina afferret, ut qua re dudum omnibus gentibus aliqua humanitate expolitis inferiores tui credebantur, ea nunc facile ceteris antecellant. Cogita

enim Rex potentissime, quo animo ille illud Sapientiae domicilium erexerit Conimbricae, quanta auxerit diligentia, quanta benignitate adornarit, quanta sollicitudine semper quae ad illud attingebant, peregerit, quam insolita non humanitate modo, sed beneuolentia complexus sit, quanta liberaliter conuocarit, exceperit, aluerit doctores in quouis scientiae genere praestantes ad iuventutem erudiendam Lusitanam. Iam reperies illud Regem optimum uoluisse, ut quonia a Rege petimus omnes uiuendi rationem, & id sequimur, in quod principem uidemus inclinare, ut imbiberent litteras omnes quas ipse tantopere amaret. Id quo facilius posset obtinere, omnia sibi esse facienda, omnes adhibendas machinas, nihil intemptatum relinquendum esse iudicauit: ut ex uirtute penderemus qui Regis laudabilem conatum imitaremur. Quod si fuit ullum tempus cum Lusitani homines rationes, & cogitationes omnes suas in studijs doctrinae constituerunt, tunc profecto esse coepit, cum auus tuus hoc regni ornamentum tanto ardore est amplexus ut pluribus in locis ditionis suae sedem sapientiae, & doctrinae de suo erigeret, & quodam modo consecraret. Quo nomine merito laudandus

dus est, & ad omne posteritatem litteris, & scriptis commendandus; & quod optime regnis suis consuluit, & quod optimo consilio litteratos plebosq; uiros adfciuit uoluntatis suae ministros. Sed ille Lusitaniam seminarium uirtutis, & doctrinae uoluit esse, & ut excoleretur curauit. Felicibus genti nostrae auspicijs diuinitus in regnum successisti, Rex potentissime, cui hoc curae tantopere est, ut nihil aliud uideatur esse (quae multa sane sunt) quod cures. Nec solum pateris ut in te tui oculos conijciant, te intueantur, te imitentur: sed exemplo praeis, & te ut sequantur inuitas, cum doctrinae studia tanta contentione pertractes, ut qui uacuis curis omnibus & negotijs omnem aetatem litteris transmittit. Itaque ille sementem fecit, collegis tu uberrimos fructus: Illum desertae multis annis litterae uindicem ab obliuione habuerunt, te patronum & auctorem nunc sunt sortitae diuq; habebunt, ut emergat uirtus, honestum reuocetur, floreat boni mores, Sapientia in tuo imperio teneat imperium. Nec solum enim tu praeclaram consuetudinem ab Auo traditam tenes, sed amplificas, illustrioremque reddis. Ex quo patet felicem esse Lusitaniarum gentem, te Rege, qui non

modo sapientiae studeas ipse, sed ut alij studeant hortaris. Non solum ut ames, & foueas doctrinam: sed colas, & exornes, his gradibus ascendentes ad immortalitatem peruenerunt ij Principes, qui & si multis saeculis iam sint extincti, uiuunt tamen in laude, eorumque fama una cum aeternitate propagatur. Quorum tu quia facta imitaris non est dubitandum, quin florentibus nominibus florentissimum inferas tuum, ut ne in omni temporum diuturnitate exarescat. Maeste uirtute Rex, laudibus eximie aui maiorumque tuorum imitator, nae tu praeclare iudicasti laudem non esse in imperio nisi cum is qui imperat, eo sit dignus. Nam, ut ait ille, Reges uirtus, non diadema facit. Hinc reges uocamus lumina, & ornamenta regni, non quod praeluceant purpura, sceptro, & corona eniteant, splendescant uel ornatu regio: Sed quod uirtus ipsorum, aliorum uitam illustrat, ad optimam rationem uiuendi allicit, mores bene constitutos conseruat, labentes confirmat, afflictos excitat, iacentes extollit, ipsi magnitudini imperij decori sit, & ornamento: Haec res impulit diuinum Platonem ut bene informatum illum suae reip. Regem omni cohorte uirtutum, omni illustrem ornamento in  
media

media urbe uellet domicilium habere, ut ex æquo omnes illa uirtute frui, illa luce illustrari possent. Quod & si regibus superioribus maioribus tuis non defuit, tibi certe ut cum maxime suppetit, & in quouis genere laudis nemine ipsorum sis inferior; & in docenda doctrina omnes longo intervallo superatos relinquo. Auxerunt illi imperium, & potentiam amplificauit bellica uirtute, nauigandi gloria, incredibilique peruestigatione ultimarum terrarum ab Oceano Atlantico ac extrema totius Africae litora, Indum, Gangē, Tapobranen; ad longe dissitos Iaponios perueniunt, regni opes supra modum extulerunt; auri, argenti, gemmarum, aromatum copiam exaggerarunt, locupletarunt multos fortunis: Sed tu his non omisis, eisdem rebus non eadem aetate pares, & aequalis atque tua praeclara uirtute nouam aliam laudem quam eorum plerique caruerunt peperisti, ut uix ullum reliqueris tuis posteris amplificandi locum. Illi propugnauerunt Lusitani imperij fines: tu defensos non dimittens propugnandi curam aequitate, sapientia, religione munis, atque exornas. Illi potentiae suae auxilia: tu et tuo & tuorum animis amplissima ornamenta comparas. Tu uariarum cognitione

gnitione rerum tuum pectus, & tuorum mentes,  
 & pietatis copijs: illi suos pecunia ditarunt. Facis tu ut multi in tuum regnum sapientiae pulchritudine lecti confluant: illi fecerunt ut ex solo, sedibusq; patrijs ciues in ultimas terras commigrarent. Illi eo genere laudis floruerunt, quod uelimus, nolimus cum multis exterarum gentium imperatoribus aliqua ex parte communicandum est: tu ea gloria, quae est propria felicissimi principis enitescis. Illorum laudes celebrabuntur quidem, sed ita ut quos imitarentur eos habuisse fateamur, tuae in eodem genere aut pares, commendabuntur, aut praestantiores in hoc genere, quod instituisti tu solus eris antesignanus, & dux; te ceteri imitabuntur, ut iam sine timore ciues tui in te possint oculos conijcere, te intueri, a te uiuendi leges deducere. Aequum enim certe erat, ut Lusitanus Rex qui dat fruges ad uictum, daret etiam leges ad uitam. Sic enim memoriae est proditum Cererem Siciliae Deam incolis illius insulae, & segetum comparandarum rationem monstrasse, & sanciuisse leges, & placita, quibus ad humanitatem eorum animi informarentur. Tu tuis ciuibus cum tam large de tuo tribuas, ut uiuant: impartiaris necesse est eam formam uitae, quam



quam duce te sequantur: Vt ea laus quae Athe-  
nienſium quondam uel illius Deae propria eſſe  
uidebatur, tibi merito atque optimo iure tota de-  
feratur. Quis enim eſt qui ignoret Luſitaniae Re-  
gem ita ſuos alere, ita ſuſtentare opibus, fulcire  
copijs, ditare de ſuo, ut pater omnium non Rex  
modo eſſe exiſtime tur? Solent alij uectigalia im-  
ponere, portoria in res omnes decernere, qua-  
cunque uia, & ratione pecuniam erogare, ut ci-  
ues exhauriant: Tu quibus rationibus illis ſuc-  
curras, eorum inopiam ſubleues, ſuſtentes ui-  
tam, cogitare, & efficere non deſiſtiſ. Vt tua be-  
nificencia prope diuina in plures extendatur ſa-  
ne quam lux illa ſolis communis omnibus uim  
ſuam & ſplendorem elargiatur. Hinc omnibus  
es carus, & amandus, non modo tuis, ſed ijs etiã,  
qui te nunquam uiderunt; neque eſt qui exiſti-  
mationem uiri boni conſeruet, qui tibi iure tuo  
non gratificetur, ut poſſit. Ego uero Rex po-  
tentiffime, cum in mea & puèritia & prima ado-  
leſcentia in illa tua bonarum artium officina Co-  
nimbricenſi fingerer, & formarer ad politiores  
litteras, iam tunc ſane animo quantum tibi om-  
nes tui deberemus, uidebam, quibus tamen uel  
rebus, uel oratione patefacere non inueniebã.



Veni in Italiam decimo fere ab hinc anno; Varijs in locis coepta studia mea refinxī, cum uiris doctissimis, quorum semper illa fuit altrix optima. Illud mecum statui non fore meum conatum inutilem ciuibus meis, si quae multorum annorum spatio sapiētissimis hominū doctrina praestantium colloquijs, consilijs, studio deniq; meo comprehendissem animo, ea aliquo modo cum alijs communicarem. Induxi animum ad negotium poeticum, quod & res mihi praeclara uisa est in qua conatum meum ponerem, & ex qua mirabiles fructus & uoluptatem omnes perciperent. Rem sum animo complexus maiore quam uires ingenij mei ferre queant: Sed tamen laudabilem, ut si non assequar, quia tamen optima concupierim, nemo me debeat reprehendere. Nam, ut ait ille, Quod si deficient uires, audacia certe Laus erit, in magnis, est uoluisse satis. Volui a primis quasi initijs rem totam exordiri. Cōposui primum libellum de componendi carminis ratione non inutilem iuuentuti, ut spero. Eum tuo nomini merito tuo dicarem, si dignum maiestate tua putassem: Sed nec hanc meam de Epigrammate commentationem dignam iudicabam, quae in tuo nomine daretur in uulgus, tamen

tamen gratificandi Regi meo uoluntas non patiebatur tantum silentium, dum maiora animo commētor, tibi nec ingrata, nec indigna ut arbitror futura, mittere ad te hunc exiguum libellum decreui testem obseruantiae in te meae, indicem uoluntatis, animi grati leue, sed contestatum munusculum. Tu Rex potētissime, quo animo maiora accipis, eodem hanc grati hominis significationem excipito. Nam tibi si grata esse studia haec intellexero, efficiam profecto ut uoluntati, & desiderio tuo quoad uires meae patiantur, satisfaciam. Texam indies maiora, & meliora, ut mihi non uoluntatem satisfaciendi, & gratificandi tui, sed facultatem defuisse omnes intelligāt: nec mihi in officio animum, sed in contentione, ingenium impedimento fuisse. Commentor de ceteris generibus carminum rationem, de artificio cuiusuis formae, & arte non pauca, propediē expediam, quae ubi absoluerō, ad maiora, & tuis auribus digna conferre me, delibero: & ut ciuibz meis dem significationem hominis non ingrati, qui quae multorum annorum studio sum affecutus, illis deferā, & tuis Rex potētissime conatibus accōmodasse ingeniū uidear, haec sum aggressus. Tu interea ( quae tua est humanitas)

C

hunc

hunc supplicem libellum, quo soles uultu, excipies, & qui alijs comitatus tuæ fontes patefacis, mihi ne sint clausi curabis. Tum ego Deum opt. max. orabo, sospitet te & fortunet Rex optime, nobisque istam benificentiam, comitatē, æquitatem, iustitiam, sanctimoniam, magnanimitatem diu, & multum seruet incolumem. Vale

Roma Kal. Maij. CIJ. IJ. LXIX.

# P R A E F A T I O

## IN LIBELLVM DE TOTO

EO POEMATIS GENERE,

QVOD EPIGRAMMA

vulgò dicitur,

ET DE IIS, QVÆ AD ILLVD  
PERTINENT.



*VM* multa sint poetae opera  
pulchra, admirabilia, diuina,  
tum nihil quod aut concinna  
breuitate, aut breui acumine di-  
centis, aut arte ipsa magis in-  
timos animi sensus afficiat, ac  
pene capiat, quam illud poe-  
matis genus, quod Epigramma uocamus. Nam illud  
si uenustum, aptum connexumq; sit, teres, & ro-  
tundum, ut inter se ita partes cohaereant, & con-  
gruant, ut distincte, breuiter, acute, & ornate sen-  
tentia exprimatur, & admirationem mouet, & uo-  
luptatem affert, non uulgarem. Multa arte opus est;  
sale, ingenij acumine, breuitate decora, dexteritate  
quadam, & iudicio; quod si quis ita componat epi-  
gramma, ut laudem eius generis, & gloriam conse-  
quatur

quatur, cum non leuem rem praestitisse iudicandum est: si proxime accesserit, non minimi ducendus est eius labor, quia ad pulchra, & laude digna contenderit, & in eo excellere uoluerit, quod pauci perfecte sunt consecuti. Ut in pictura multos reperiemus maioribus in operibus non contemnendos: nonnullos perfectos: in minoribus uero picturae formis suo colore, & decoro effingendis, paucos affabre muneris sui eam partem absolueri uidemus. In magna pictura etiam si quaedam sint minus uenusta, nec locis apta, nec umbris distincta; multa tamen & colorum uarietate capiunt, & distinctione membrorum, & uestium cultu, & neruorum eminentia, statu, & situ intuentium oculos, & animos afficiunt. In exiguis formis quoniam omnia uno intuitu sunt spectanda, uno oculorum iudicio eodem tempore ad animum referenda si quo in loco peccatum sit, aut a decoro discessum, facile animaduertimus, & uel exiguo uitio totam picturam eo genere improbamus. Idem accidit in epigrammate. Nam in opere longo (boni praesertim poetae) multa esse est necesse; quae uoluptate afficiunt, & nonnullarum rerum aut leuium; aut minus cohaerentium accessionem compensent. In epigrammate uno eodemque tempore omnia quae dicuntur in animum influunt, aut sententia breuibus inclusa numeris simulac leeta est influit in sensus

*sus intimos, mouet, capit, excitat, expectationem ex-  
plet: aut explosa eiicitur, & repudiatur. Quoduis  
poetices genus est admirabile, si artificiose exprima-  
tur, quæuis forma poeseos laude digna: Sed in epi-  
grammate breuitas delectat, acumen excitat, concin-  
nitas capit, haeret sententia, lepor uoluptate incredibili  
animum perfundit. Vt nihil sit iucundius, nihil dulcius,  
nihil laudabilius apto, acuto, breui, distincto, suis nu-  
meris absoluto epigrammate. Amamus omnes breuita-  
tem, res uero urbane, & false prolatas excipimus ala-  
cri, & prompto animo: Vbi uero quid a communi usu  
pronuntiatum, nouum, & inusitatum, admiratione di-  
gnum, siue nouo modo prolatum, aut legimus, aut au-  
dimus, capimus uoluptatem uel maximam, & memo-  
ria sepientes sententiam, uerba, & numeros repeten-  
tes, gestimus gaudio, & laetitia singulari afficimur.  
Fuerunt in pretio apud ueteres qui nullum non expres-  
serunt poeticae genus: Epigrammatum scriptores alij  
alio tempore floruerunt non sine laude, & ingenij ad-  
miracione. Sed hominibus nostris alijs siue studijs,  
siue negotijs, curis que distentis, si otium aduersus  
suppetit, hoc potissimum uideo poeseos genus arridere,  
huiusmodi probare omnes poeticas scriptiones. Nam  
& sermone Latino, & patrio breuia illa poemata am-  
plectuntur, in quæ conijciant acutas sententias ad  
laudem,*

laudem, uituperationem, irrisiōem, cauillationem, criminationem, & ad quacūvis alia in quocūque genere accommodata . Quod cum animaduertērem & de eo poematis genere tam bene sentirem, ut si ita essem consecutus, id in meis rebus secundis numerarem, operae pretium me facturum existimaui, si quae uel ueterum lectione, uel studio meo potui colligere, quaeque in rem praesentem conuenire iudicaui, ea hic exprimam paucis, ut discēntium utilitati consulam . Ut enim est praeclarum acutum, lepidum, & concinnum epigramma componere : ita ea tenere, quibus ad eam laudem perueniatur, magnificum . Nec enim vulgaris & quotidiana consequentis ingenij est, perfectum undique, et elaboratum artificio suo, & momento epigramma concludere . Non est in eo posita illius ratio & uis, ut sententiam numeris astringas, uocum copiam compares, epithetorum quasi quandam instruxeris supellectilem, materiam ordine quodam distinxeris, ut magna graui ter, submissa humiliter, mediocria temperate describas . Maiora sunt, quae requiruntur, nec ex grammaticorum officina petenda : sed ex abditis poeticae praeceptis haurienda, seligendaque iudicio quodam, & arte . Nec enim consilium illius, qui hoc in genere excellere elaborat id spectare debet, quod toti arti est commune, ut in poemate uoluptatem utilitati admisceat, nec



nec minus oblectet lectorem, quam instruat: demonstrat in uitij summam inesse turpitudinem, prope diuinam gloriam in uirtutibus: una denique, eademq; opera & sensus animi leniter afficiat, & mores cohonestet. Sed ut breuiter, acute, urbane, cum admiratione afficiat, nihil ut animus requirat legentis. Ut qui legit, cum uoluptate legat; ac iudicet non esse omnia leuiter aestimantis, haec praestare. Sed eius qui ingenio ualeat, polleat acumine, sit instructus arte, iudicium adhibeat, naturam rei expendat. Non tamen est satis hanc ad laudem consequendam ubertas illa ingenij a natura donata, non breuium productarumque syllabarum ratio, non dimensio numerorum, non canorus uocis sonus sufficiunt. Quominus est mirandum si ceteris informis, & partibus poetices tot principes extiterint, in hoc genere ut excellerent, paucissimis contingerit. Quod uel existimatione falsa ingenij accidisse plurimis, qui eam rem tractauerunt, putandum est: uel inscitia, et artificij ignorantia, uel incuria quadam est iudicandum. Illud tamen affirmare audebo, nullum esse poematis genus utilius, & ad perfectam poeseos ab solutionem comparandam accommodatius, quam hoc de quo loquimur. est enim haec exercitatio & ad ingenium acuendum idonea, & ad acumen exprimendum apta, & ad informandum animum pulcherrima suppellectili lauta, & absoluedam perfectam poetae & omni laude

laude dignam scriptionem magnopere necessaria alit copiam, siluescentem abundantiam coercet, necessaria inferit, amputat redundantia, nutrit concinnitatem & scribendi leporem. Ab hac & uenustas acquiritur, & uerborum optimorum, rerumque propriorum delectus cognoscitur, & eorum constructio habetur, nec licentia numerorum quidquam, quod non sit necessarium inferi conceditur. Hac sententiarum concinnitas instruitur, & arguti, certi & circumscripti numeri, numerorumque ambitus de industria quaeruntur. Hac languor quasi quidam suo loco adhibitus laudem consequitur, & industria, ac studio non ex insidijs studetur scriptionis pulchritudini. In hac nihil nisi aut graue, aut elegans admittitur, quod & transferat animos, & moueat huc & illuc. Qui motus cogitationis argutia, uenustate, nouitate, constructione rerum, celerriter agitat per se ipse delectat. Ut igitur aetas haec nostra quae cum alias poeticae partes amplectitur studiose, tum hanc assiduo usu, exercitationeque excolit, laudem eius generis sibi possit merito comparare, epigrammatis usum, naturam, artificium, genera, finem, uirtutes denique omnes, quae, & quales sint aperire, non erit inutile: de quo toto genere breuiter differere, abire non erit. Quod ut efficere possimus, re ab initio completemur, et quae utilia iudicauerimus, seligemus.

Caput

De notatione etymologiaque nominis  
caput primum.

**M**agna uis inest plerunque in nomine ad aperien-  
dam rei naturam, atque ideo uiri sapientes inde  
iubent exordiri, quo commodius de tota re agatur.  
Epigramma ueteribus cuiuslibet rei inscriptio, siue de  
aliquo testificatio appellatur: seu dictum, sententia,  
iudicium honoris, dedecoris uel causa prolatum, in quo  
aliquid insit reprehensione, laude, commendatione, me-  
moria dignum. Ac etsi quamcunque scriptionem no-  
men indicet (unde etiam Lemma epigramma dicitur)  
tamen loquendi consuetudine, poetarumque usu pro-  
prium nomen effectum est, eius generis poematis, quod  
laudem uel uituperationem contineat: siue utriusque  
rationem breuitate, & concinnitate perfectum. Hinc  
quid epigramma sit facile intelligemus.

Quid sit epigramma caput secundum.

**C**ognita nominis notatione, epigrammatis defini-  
tio enucleanda est: quod ex eo patebit, unde no-  
men rei fuit inditum. Epigramma enim nihil est aliud  
quam breue poema cum simplici rei cuiuspiam indica-  
tione uel personae, uel facti, seu est contestatio dedy-

*Est ex propositis in commendationem rei alicuius, seu detestationem. quae descriptio diuisionem simul indicat epigrammatis, dum aut indicationē simplicem rei, aut compositam ex propositis deductam dicimus esse. simplex rei indicatio est illa Virgilij in iij. Aeneidos, ubi illa proloquitur*

*Aere cauo (lypeum magni gestamen Abantis  
Postibus aduersis figo, &) rem carmine signo.*

*Subiungit indicationem.*

*Acneas haec de Danaïs uictoribus arma.*

### De simplici epigrammate, & composito caput tertium.

*Sunt quaedam epigrammata simplicia; quaedam uero composita, quae ex propositis ad aliud quidpiam quod uel sit maius, uel minus, uel par, uel contrarium referuntur. Simplex est epigramma, in quo unam tantum rem exprimit poeta. Ut facit Catullus in Lesbiam, a qua ait se amari.*

*Lesbia mi dicit semper male, nec tacet unquam*

*De me dispeream me nisi Lesbia amat.*

*Quo signo? quasi eadem totidem mox deprecor, illi Assidue, uerum dispeream nisi amo.*

*Exemplum compositi, in quo aliud deducitur ex propositis,*

positis, quod sit maius, illud Catulli in Lesbiam quo lo-  
co sibi met gratulatur quod in gratiam iterum cum ea  
redierit, amoremque eius conciliarit, quod cum minus  
id sperauerit, insperanti tamen ex animi sententia  
res contigerit.

Si quidquam cupidoque, optanti que obigit unquam,  
Insperanti hoc est gratum animo proprie.

Quare hoc est gratum, nobis, hoc carius auro,

Quod te restituis Lesbia mi cupido.

Restituis cupido, atque imperanti ipsa refers te:

O mihi cara magis candidiore nota.

Quis me uno uiuit felicior, aut magis mi esse

Optandum in uita dicere quid poterit?

Non nonquā deducitur aliquid quod sit minus.  
efficit id Catullus dum Quintiā laudat, & extol-  
lit; ita tamen ut longe esse inferiorem Lesbiam ue-  
nustate, & lepore ingenuo dicat.

Quintia formosa est multis, mihi candida, longa,

Recta est, haec ego singula confiteor.

Totum illud formosā nego: Nam nulla uenustas,

Nulla in tam magno est corpore mica salis.

Lesbia formosa est, quāe cum pulcherrima tota est,

Tum omnibus una omnes surripuit Veneres.

& illud eiusdem

Gallus habet fratres quorum est lepidissima coniux

Alterius lepidus filius, alterius  
 Gallus homo est bellus, nam dulces iungit amores,  
 Cum pucro ut bello bella puella cubet.  
 Gallus homo est stultus, neque se uidet esse maritum  
 Qui patruus patruī monstret adulterium.  
 Sed nunc id doleo quod purae impura puellae  
 Suauia coniunxit spurca salina tua.  
 Verum id non impune feres, nam te omnia saecula  
 Noscent, & qui sis fama loquetur anus.  
 Interdū sequitur par ex propositis, ut Catullus.  
 Quinti si tibi uis oculos debere Catullum,  
 Aut aliud siquid carius est oculis,  
 Eripere ei noli multo quod carius illi  
 Est oculis, siquid carius est oculis.  
 et illud etiam apud eundem  
 Nulla potest mulier tantum se dicere amatam  
 Vere, quantum a me Lesbia amata mea est.  
 Nulla fides ullo fuit unquam foedere tanto,  
 Quanta in amore suo ex parte reperta mea est.  
 Plerunque sequitur contrarium, siue ex contra-  
 rijs & repugnantibus rebus epigramma contexi-  
 tur lepidissimum. Vt Catullus.  
 Lesbius est pulcher, quid ni quem Lesbia malit  
 Quam te cum tota gente Catulle tua.  
 Sed tamen hic pulcher, uendat cum gente Catullum  
 Si tria

*Si tria amatorum suauia reppererit.  
Odi et amo, quare id faciam fortasse requiris? idem.*

*Nescio, sed fieri sentio, & excrucior.  
Nulli se dicit mulier mea nubere malle, idem.*

*Quam mihi, non si se Iuppiter ipse petat.  
Dicit, se mulier cupido quod dicit amanti,*

*In uento & rapida scribere oportet aqua.  
Sumuntur etiā a similitudine, siue dissimilitudine quibus uenustissime condiuntur. quorum exempla possem ex ueteribus adducere. Sed ne multus sim in re clara, ad alia conuertam orationem.*

*Quot sint ad epigramma genera uersuum,  
& quae caput quartum.*

**N**Ullum est uersuum genus quo epigramma non cōstet, quo sit ut forma haec pateat latissime, eiusque ratio uaria sit, & multiplex. Nam epopeia certum habet genus carminis, definitum elegia, proprium, & suum comaedia, & tragaedia, designatum, & mixtū quodam lyrica, nec enim omnia recipiunt; epigramma, quouis genere uenustissime componitur. Nec solum oratio certis numeris astricta epigramma dicitur, sed inscriptiones monumentorum etiam oratione soluta scriptae, epigrammata uocari consueuerunt. *Ut M. Tullius*



lius in epistolis ad Atticum libro undecimo inscriptiones monumentorum epigrammata uocat, uersuum autem generibus omnibus componi, contineri que epigramma usus ueterum declarat. Nam in lusibus diuersi generis esse uidemus, quae tamen epigramma uocantur: idem apud Catullum. In libro autem epigrammatum graecorum etiam uersibus Heroicis epigrammata continentur. Nec tam ad numerum spectarunt antiqui horum poematum auctores & principes, quam ad rem, quam sunt eo poematio complexi. quod ex M. Tullij in oratione pro Archia poeta aperte colligitur: & ex quinta Tusculana quaestione multo clarius, ubi de Archimede Syracusano loquitur hoc modo. Ex eadem urbe humilem homunculum a puluere, & radio excitabo, qui multis annis post fuit Archimedes; cuius ego Quaestor ignoratum ab Syracusanis, cum esse omnino negarent, septum undique, & uestitum uepribus, & dumetis indagavi sepulcrum; tenebam memoria quosdam senariolos; quos in eius monumento esse inscriptos acceperam: qui declarabant in summo sepulcro Sphaeram esse positam cum cylindro: ego autem cum omnia collustrarem oculis (est enim ad portas Agragianas magna frequentia sepulcrorum) animaduerti columnellam non multum e dumis eminentem, in qua inerat sphaerae figura, & cylindri, atque ego statim Syracusanis

sanis (erant autem principes mecum) dixi me illud ipsum arbitrari esse, quod quaererem: immissi cum salcibus multi purgarunt, & aperuerunt locum, quo cum patefactus esset aditus, ad aduersam basim accessimus. apparebat epigramma exesis posterioribus partibus nerficulorum dimidiatis fere. Plerumque tamen uersuum modi ad sententiam accommodantur ut Jambici, Hendecasyllabi, Hexametri, & ceteri suo adhibentur interdum loco. Res modo filo suo, & decoro exprimat, uersuum usurpetur uel hoc, uel illud genus, quod magis in rem conuenire, is qui componit iudicauerit.

### De eius dictione caput quintum.

**D**ictio in epigrammate pura esse debet, lecta, sincera, elegans, quae rei dignitatem, quantum fieri potest, augeat. Quae nihil hauriat de faece: sed lauta sit, & magnifica, munda, & culta. Tot uerbis, & generibus uerborum constet, tot speciebus, formis, figuris, modis; quot sunt in ea lingua, & sermonis ratione, in qua componis, genera uerborum, species, formae, figurae, modi. Multa praeterea eius leges nouae, & ficta admittunt, solacissimum interdum cum dignitate interponit, ut Martialis.

Non es uitiosus Zoile, sed uitium.

Barba-

Barbarismum non refugit, ut Catullus  
Commoda dicebat; si quando commoda uellet

*Dicere & insidias Arrius insidias.*

Distortam etiam dictionem non spernit, sed in-  
ferit uenuste, Vt Martialis.

*Non es bonus sed optimus malorum.*

Nam illa dictio uitiosa, nouitas, & distorta copulatio  
uocum ac barbara mouet risum, excitat admirationē,  
insluitque in sensus. Totum itaque epigramma cultū,  
limatum, expolitum, teres, rotundum, affectuum ple-  
num, molle, argutum, suauē, placidum, decorum esse  
debet; quod animum capiat, & in sensus legentium in-  
timos sese insinuet: quod excitet; quod moueat eum,  
quem uelis affici, quo uolueris modo. Non ui impel-  
lat, sed incunditate alliciat. Non sit tyranno simile qui  
mauult metui, quam amari. Sed attrahat ad sese, &  
inuitet; rapiat interdum, lectum iterum magis, ac  
magis recreet. Non sit illis epulis simile quæ prius sa-  
tiant, quam famem expleuerint: teque antequam gu-  
stes, fastidio afficiunt. Non minaci quodam impetu,  
& modo auditorem inuitum, aut haerentem teneat,  
& ubi uult tenere abigat. Non abiiciat rem magis,  
quam extollat, corrodat, quam expoliat, & elimet.  
Non ita exultet, ut nesciat suo loco consistere, haereat  
animo, relinquat in auribus uestigium sui. Non atte-  
rat:

rat : non effluat ; non labatur ; reperitur saepius , & eo magis probetur , quo magis legitur . Condiatur multo sale , ornetur lepore suo , aceto non nunquam aspergatur , si res et tempus postularint . Relinquat ambages , tritas fabulas fugiat , nihil vulgare , nec plebeium admittat : omnia in epigrammate lucem , et nitorem quendam prae se ferant . Verba sint propria , & rebus illustrandis apta : translata decore : adhibeantur accommodata , non grandia , nitida , expressa , rotunda , apte ficta , non popularia , non sordida , non obsoleta , non aspera , non mixta ex uarijs linguis , etiã si poetae Graeca interdum interponant nec sine laude . Illud in primis curandum est diligenter , ne ullum in epigrammate ponatur uerbum otiosum , ad explendum uersum magis , quam ad rem significandam comparatum . Nam et si uis insit magna in epithetis ( quae apposita Latine M. Tullius uocat ) si modo sint uenuste adhibita , & tota ad rem referantur , uitiosa interdum sunt , quae ad dimensionem quaeruntur magis , & numerum , quã quae ad sensum faciunt diligentissime curandum est , ut sint maxime propria , & idonea uerba et nomina fixa , quae substantiua uulgo Grammaticorum uocat . Nam his duabus rebus numerosa conclusione adhibita perplacet epigramma , & in sensus influit , totumq; negotium in his inest , reliquae dictiones ad ornamentum apponuntur .

tur . epitheta tamen sint selecta, & rebus ipsis apta .  
*Virg. li. 1. 1.* Epithetum distinguat ambigua, Ut Deus bellipotens,  
*Aen.* aequor Tyrrhenum . Significet qualitatem aliquam ,  
*Idē li. 1. 1. Ae.* ut collis aprius, mella fragrantia, dulcia, roscida; exi  
*Idē in Buc.* guus mus. Augeat, ut tēplum immane, uiuida bello dex  
*Georg.* tera : Aequet, ut lupus ululans, oues balantes . Acci-  
*Idem in li. 1.* piantur a futuro euentu , ut miserrima Dido & infe-  
*Georg.* lix, quoniam non solum perditura erit pudicitiam, sed  
*Idē li. 6. Ae.* & regnum & uitam . a spe felix Tolumnius , dixit  
*Idē li. x. Ae.* Turnus quia ita sperabat . a causis, ut Dona cerealia ,  
*Idē li. 1. Ge.* Vulcania arma. Ab effectis, ut frigida mors, tristis se-  
 neētus , pax tranquilla . Ab adiunctis , ut cristatus  
 Achilles, & immitis . herbosum flumen. Per Hyper-  
 bolem, ut ferrea uox . Per Metaphoram, ut mobilis ri-  
 uus, uer purpureum . Per synedochen, ut Virg.  
 Poculaque inuentis Acheloia miscuit uuis .

Vuas pro uino . pocula Acheloia, pro Aqua  
 Acheloi fluuij, quae poculis continetur :  
 Acheloum pro quauis aqua . ita etiam

Pingui glandem mutauit arista.

Per indignationem . Periurae Troiae . Per contem-  
 ptum, ut semiuiri Phryges . quaedam a patria, ut La-  
 rryssaus Achilles . sunt quaedam usu facta propria , ut  
 Phoebus Apollo . Quaedam ex consuetudine contra-  
 ria significant, ut horrētia Martis arma. hoc est hor-  
 ribilia.

ribilia. penetrabile frigus, quod penetrat. Quaedam ex quodam acumine & doctrina, ut Marpesia cautes. uinum Falernum, Massicum; caecubū. Quaedam sunt necessaria, Ut pater conscriptus. Quaedam ponuntur ob nitorem, ut tempestates quae sonoras. Quaedam rebus apponuntur ob aliquod ipsarum munus, Vt Virg. lib. 6. Aen. Diana Triuia, Luna menstrua, idem lib. 1. Geor. Quaedam a loco, ut Virg. lib. 4. Aen. Hircana Tigris, & in Buc. Leo Paenus. & Getulus. li. 5. Aen. Quaedam ex genere, ut Virg. lib. 5. Aen. Achilles Pelides. Anchisiades Aeneas. lib. 6. Quaedam a similitudine, ut Eburneum collum, Ouid. Metam. Quaedam ob quantitatem, ut Virg. lib. 1. Georg. Longus coluber. Quaedam ab his, quibus sacra, ut Phoebea laurus, Palladia Oliua. Ouid. de Fastis. Quaedam a locis sibi sacris, ut Venus Cytherea. Virg. lib. 1. Aen. Delius Apollo, lib. 6. Aen. Quaedam a ui aliqua, ut graecolens Auernus. Virg. lib. 6. Aen. Sit igitur illa cura eius qui componit in inferendis epithetis, ut nullum superfluum adhibeat, & ad explendos magis numeros quam ad illustrandam sententiam aptum. Non enim apposita ponuntur ut rei membra, sed ut ornamenta. Perinde ergo ac lux, & nitor quidam debent illustrare, & fulcire uersum, ut fimbriae in ueste pretiosa adhibitae, quae pallam, togam, tunicam cohonestant, & exornant, nec

ad alium usum interseruntur. Ille in adhibendis appo-  
 sitis non errabit, qui ea addiderit, quae Virgilius, Lu-  
 cretius, Tibullus, Catullus, Ovidius, Horatius adhi-  
 buit. Noua tamen apponi possunt, quae dignitatem ha-  
 beant, & idonea sint, & significantia.

### De usu epigrammatis, caput sextum.

**P**rima inuentio, ususque epigrammatis fuit in Sta-  
 tuis, & signis, imaginibus, trophaeis, & quibus-  
 cunque monumentis. Ut qui Herculi signum erige-  
 bat, illi inscriptionem addebat. Magno Alcidi. siue  
 Herculi patri. siue Custodi Urbis. siue Orbis domitori.  
 & huiusmodi. Ut illud in Rufum Rhetorem.  
 Rhetoris haec Rufi statua est, si saxeae, Rufi

Cur id ais? semper saxeus ipse fuit.

In trophaeis Virg lib. undecimo.

Mezenti ducis exuias, tibi magne trophaeum  
 Bellipotens, aptat rorantes sanguine cristas.  
 Telaque trunca uiri, & bis sex thoraca petitem  
 Perfusumque locis clypeumque ex aere sinistrae  
 Subligat atque ens collo suspendit eburnum.

In monumentis Horatius lib. 1. Ode quinta.

--me tabula sacer

Votiu paries indicat humida

Suspen-



*Suspendisse potenti  
Vestimenta maris Deo*

Et illud Valerij Catulli dum dedicat nauculam  
Castori, & Polluci.

*Phasellus ille, quem uidetis hospites,  
Ait fuisse nauium celerrimum,  
Nec ullius natantis impetum trabis,  
Nequiuisset praeterire, siue palmulis  
Opus foret uolare, siue linteo*

Deinde post multa, subiungit.

*Sed haec prius fuere, nunc recondita  
Senct quiete, seque dedicat tibi  
Gemelle Castor, & Gemello Castoris.*

Est autem tunc epigramma rei cuiuspiam inscrip-  
tio, quoties illi apponitur: quando uero in codicem re-  
fertur, tunc ipsa statua, siue monumentum est indica-  
tio epigrammatis; & quasi inscriptio: uel certe loco  
statuae, & monumenti, quasi quaedam subicitur in-  
scriptio & titulus. Verbi gratia, in Veneris statua illa  
indicatio.

*Orta solo, suscepta solo, patre edita caelo  
Aeneadum genetrix, hinc habita alma Venus.*

Hic ueteribus epigrammatum usus, nostris & saeculis  
superioribus praeterquam quod in hanc sententiam ad-  
hibebantur, Vt in statuam Iouis, in templum Dianae,  
& ce-

& cetera: breuia etiam poemata in laudem uituperationemque alicuius acute, & urbane conclusa epigrammata uocarunt. atque ita usus obtinuit ut pleni libri de epigrammatis fuerint inscripti, in quibus uel facta cuiuspiam insignia, uel animi corporisque dotes, & uitia exprimerentur.

De forma & ui epigrammatis, & quid eius sit proprium, cap. septimum.

**F**orma epigrammatis quasi anima, & spiritus, est argutia: sine qua iacet, & languet. quae si subsit, etiam si alia requiras, probatur tamen, & oblectat animi sensus. Si uero epigramma Argutia caret, epigramma non est; ut res aliae quae suam formam per quam sunt id quod sunt, non habent. Nam nerui, succus, & quasi sanguis epigrammatis subtilitas arguta, & acumen est. Propria uero illius uirtus est breuitas. Nec uero breuitatem definitio certo uel numerorum, uel uersuum ordine, & multitudine. Nam & simplex uersus epigramma est, & e pluribus distichis absoluta, & inclusa sententia epigrammate continetur. Non tamen nimis longum probo, ne elegia sit uel promissum opus. & quoniam epigramma inscriptio quaedam est, non opus aliquod, illud optimum, quod breuissimum. in Distichis

*ſthicis inefſe eius uenufatem docet Phormio Graecus auctor, quo loco omne epigramma diſthico uno ait includendum eſſe, alioqui iam deſinere eſſe epigramma, eſſe uero raphodiam. Nobis autem & ſi alios qui uel intra ſex diſthica ſententiam concluſerunt, liceat imitari: danda eſt certe opera, ut breuitati ſtudeamus, quo ad fieri poſſit, ueteres imitantes, ne qui illos ſequimur, anteire uideamur. Ut in odis Graecos, & Horatium, in alijs auctorem luſuum Catullum, Tibullum, auctoresque antiquos. Quod ſi breuitatem propriam Virtutem, epigrammatis eſſe dicimus, quo breuius illud fuerit ſeruato decoro, & argutia conditum, eo iucundius, gratius, concinnius erit iudicandum. Argutia enim animum excitat, & capit: breuitate haeret memoria, & reficit: Itaque has duas Virtutes debet diligenter inſpicere, & ſeruare, qui in componendo epigrammate uult excellere. Breuitatem ſcilicet, & argutiam, in quibus ineſt illius uis, & energia. Felix in argutijs Catullus, felicior Martialis, quamuis rebus alijs multo ſit inferior, minusq; cultus, & limatus: Comparatur uero argutia, quoties conclusio eſt inexpectata, ſiue quoties expectationi eſt contraria, Ut illud in Luſibus de malo arbore, cui affixa fuerunt mali poetae carmina.*

*Quid fruſtra quereris colone mecum*

*Quod*

*Quod quondam bene fructuosa malus  
 Autumnis sterilis duobus astem?  
 Non me prae grauat ut putas senectus,  
 Nec sum grandine uerberata dura,  
 Nec gemmas modo germine exeuntes,  
 Seris frigoris ustulauit aura:  
 Nec uenti, pluuiae ue, siccitas ue,  
 Quod de se quereretur malum dederunt.  
 Non sturnus mihi, graculus ue raptor,  
 Aut cornix anus, aut aquosus anser,  
 Aut cornus nocuit siticulosus:  
 Sed quod carmina pessimi poetae  
 Ramis sustineo laboriosis.  
 Et illud Martialis libro sexto in Coracinum epi-  
 grammate quinquagesimo quarto.  
 Quod semper casiaque, cinamoque  
 Et nido niger alitis superbae  
 Fragras plumba Nicerotiana  
 Rides nos Coracine nil olentes,  
 Malo quam bene olere, nil olere.*

De quibusdam uirtutibus epigrammatis,  
 caput octauum.

**C**um in omni poemate, tum uel ut cum maxime in  
 epigrammate Venustas, suauitas, uehementia, et  
 energia

*energia desiderantur. Venuſtas nunquam debet abeſſe, quae in prudentia quadam conſiſtit, & dextertate electionis, & collocationis. Suauitas allicit lectorem, uel inuitat ad legendum. Ea oritur ex ijs quae habent in ſe iucunditatem, & uim afficiendi ſenſum, animum-que legentis: quae uis tanto eſt maior, quanto clariuſ exprimitur. Venuſtas eſt decor, & pulchritudo epi-grammatis. Suauitas uero uenuſtatis pulchra, & delicata ſpecies, quae efficit, ut auide legas, nec te lectio faſtidio afficiat. Venuſtati aduerſatur deformitas, ſiue turpitudine, Suauitati aſperitas. Aliquando Apoſtrophe uel ad ſe uel ad alios, ut apud Catullum & ad ſe & ad puellam.*

*Miſer Catulle deſinas ineptire,  
Et quod uides periſſe, perditum ducas,  
Fulſere quondam candidi tibi ſoles,  
Cum uentitabas quo puella ducebat,  
Amata nobis quantum amabitur nulla.  
Ibi illa multa tum iocoſa fiebant  
Quae tu uolebas, nec puella nolebat,  
Fulſere ueri candidi tibi ſoles,  
Nunc iam illa non uult, tu quoque impotens eſto,  
Nec quae fugit ſectare, nec miſer uiue,  
Sed obſtinata mente perſer, obdura.  
Vale puella, iam Catullus obdurat.*

*Nec te requireret, nec rogabit inuitam.*

*At tu dolebis, cum rogaberis nulli.*

*Scelestâ te ne? quae tibi manet uita,*

*Quis nunc te adibit? cui uideberis bella?*

*Quem nunc amabis? cuius esse diceris?*

*Quem basiabis? cui labella mordebis?*

*Quoties item sunt quae paria paribus referuntur: quoties siluis, montibus, arboribus, rebus inanimis damus sermonem, uel cum ijs loquimur. Ut in lusibus*

*Quam puero legem fertur dixisse Priapus,*

*Versibus hic infra scripta duobus erit.*

*Quod meus hortus habet, sumas impune licebit,*

*Si dederis nobis, quod tuus hortus habet.*

*Catullus ad Sirmionem peninsulam*

*Peninsularum Sirmio insularumque*

*Ocelle, quascunque in liquentibus stagnis,*

*Marique nato fert uterque Neptunus,*

*Quam te libenter, quam laetus inuiso,*

*Vix mi ipse credens Thyniam, atque Bythinos*

*Liquisse campos, uidere te in tuto:*

*O quid solutis est beatius curis*

*Cum mens onus reponit, ac peregrino*

*Labore fessi, uenimus larem ad nostrum.*

*Desideratoque acquiescimus lecto.*

*Hoc est quod unus est, pro laboribus tantis.*

*Salue*

*Salve o uenusta Sirmio atque hero gaude.*

*Gaudete uos quoque Lydiae lacus, undae*

*Ridete quidquid est domi cachinnorum.*

*Energia quasdam rerum quasi ad aspectum subiicit  
ideas, & species singulari quodam artificio, & ordi-  
ne, ut exterriti, stupidi, furiosi, iracundi, malitiosi,  
denique rei quasi faciem depingit. Energia est in uer-  
bis, & rebus. in lusibus*

*Carminis incompti lusus lecture procaces*

*Conueniens Latio pone supercilium.*

*Non soror hoc habitat Phoebi, non Vesta sacello,*

*Non quae de patrio uertice nata Dea est.*

*Sed ruber hortorum custos membrostior aequo,*

*Qui tectum nullis uestibus inguen habet.*

*Aut igitur tunicam parti praetende tegendae,*

*Aut quibus haec oculis aspicias, ista lege.*

*Est autem energia item aut in facto, aut in di-  
cto, aut in animo. factum uoco quamlibet rem.  
ut Catullus ad Lesbiam:*

*Huc est mens deducta tua mea Lesbiam culpa,*

*Atque ita se officio perdidit ipsa suo.*

*Vt iam nec bene uelle queam tibi si optima fias*

*Nec desistere amare omnia si facias.*

*& . O saeculum insipiens & in facetum.*

*& alio loco. Ouentum horribilem atque pestilentem.*



Martialis de Mutio Scaeuola:

*Dum peteret regem decepta satellite dextra*

*Iniecit sacris se peritura focis.*

*Sed tam saeua pius miracula non tulit hostis,*

*Et raptum flammis iussit abire uirum.*

*Vrere quam potuit contempto Mutius igne,*

*Hanc spectare manum Porfena non potuit.*

*Maior deceptae fama est, & gloria dextrae,*

*Si non errasset fecerat illa minus.*

*Et illud.*

*O quantum est subitis casibus ingenuum.*

*Et illud ubi furta mapparum Hermoginis  
exposuit.*

*Ad caenam Hermogenes mappam non attulit unquam,*

*A caena semper rettulit Hermogenes.*

*In sententijs quibus rem concludimus magna energiae  
vis inest, & in modo describendi unamquamque rem,  
& illius adiuncta, quas uulgius circumstantias uocat.  
Sed hic duo uitia sunt diligenter praecauenda. Primum  
ne turgeat oratio inani sonitu uerborum: ne ue torquea-  
tur extra decorum. Secundum ne dictio languescat  
sine spiritu, & nervis abiecta, aut humili conclusionem  
aut rei totius expositione.*

*Quibus*

Quibus in generibus eloquentiae uersetur epigramma, caput nonum.

**E**st oratori finitimus poeta, ut docet locis pluribus Marcus Tullius : uersantur pene in eisdem spatijs, eisdem orationis luminibus susceptam materiam exornant : & quae tractanda receperunt, eisdem in generibus eloquentiae expoliunt ; quamuis ordine, & modo diuerso . Oratores sane dicuntur de omnibus rebus ornate copiose scienter posse dicere : hoc est bene : Poetae idem praestant numerosa oratione . Illi quamcunque quaeestionem ad tria genera eloquentiae accommodant : Hi etiam eisdem in generibus causarum uersantur exponendis rebus : licet sit diuersus utrique finis propositus . Nam in genere iudiciorum quo aliquē tuemur siue criminamur siue ab iniurijs uindicamus siue insinulamur uersatur, qui epigrammata componit, & ut orator oratione id efficit, sic scriptor epigrammatum epigrammate praestat. Catull. in Asinium

Marrucine Asini manu sinistra

Non bene uteris in ioco, atque uino,

Tollis linthea negligentiorum

Hoc falsum esse putas fugit te inepte,

Quamuis sordida, res, & inuenusta est,

Non credis mihi, crede Pollioni

Fratri,

*Fratri, qui tua furta, uel talento*

*Mutari uelit, est enim leporum*

*Disertus puer, ac facetiarum.*

*Quare aut hendecasyllabos trecentos*

*Expecta, aut mihi lintheum remitte,*

*Quod me non mouet aestimatione,*

*Verum est <sup>sumus</sup> mei sodalis.*

*Nam sudaria setaba ex Hiberis*

*Miserunt mihi muneri Fabullus*

*Et Veranius, haec amem necesse est.*

*Vt Veraniolum meum, & Fabullum*

*In genere deliberationis est illud Catulli ad  
Lesbiam.*

*Viuiamus mea Lesbia, atque amemus.*

*Rumoresque senum seueriorum*

*Omnes unius aestimemus assis.*

*Soles occidere, & redire possunt,*

*Nobis cum semel occiderit breuis lux*

*Nox est perpetua una dormienda.*

*Da mihi basta mille, deinde centum,*

*Deinde mille altera, deinde secunda centum,*

*Dein usque altera mille, deinde centum,*

*Dein cum millia multa fecerimus,*

*Conturbabimus illa, ne sciamus*

*Aut ne quis malus inuidere possit,*

*Cum*

*Cum tantum sciat esse basiorum.*

*Plurima sunt in hoc genere apud Catullum & apud Martialem, quae ne multis praeterimus consulto. Tu uno exemplo esto contentus, cetera inde petas licet. Genus exornationis est amplissimum, quoniam in id (&) uirtutes omnes cadunt, ut commendes: (&) uitia omnia, ut uituperes; (&) quidquid laude uel uituperatione dignum homines iudicant. Huc gratiarum actio, gratulatio, quacuis commendatio refertur. est namque forma haec copiosissima oratoribus ad dicendum, (&) poetis campus latissimus in quo euagari, & excurrere possint: quaecunque facta improbando, laudando, commendando, gratulando. Quocirca tenenda diligenter sunt ea, quae laudari, quaeque uituperari conueniat. Sepienda memoria praecepta, quibus id fiat, comprehendendum animo artificium eius formae, ut cum laude, in eo uerferis. Vide quemadmodum laudat Catullus M. Tullium*

*Disertissime Romuli nepotum*

*Quot sunt, quotque fuere Marce Tulli,*

*Quotque post alijs erunt in annis,*

*Gratias tibi maximas Catullus*

*Agit, pessimus omnium poeta;*

*Tanto pessimus omnium poeta,*

*Quanto tu optimus omnium patronus.*

Vt illud quo formositatē Roscij laudabat Quintus Catullus, quod est apud M. Tullium in primo de natura Deorum.

*Constiteram exorientem Auroram forte salutans  
Cum subito a laeua  
Roscius exoritur*

*Pace mihi liceat caelestes dicere uestra  
Mortalis uisus pulchrior esse Deo.*

At Martialis est illud libro septimo epigrammate uigesimoquarto in malum poetam.

*Dulcia cum tantum scribas epigrammata semper,  
Et cerussata candidiora cute.*

*Nulla mica salis, nec amari fellis in illis,  
Gutta sit, o demens uis tamen illa legi?*

*Nec cibus ipse iuuat morsu fraudatus aceti,  
Nec grata est facies cui gelasius abest.*

*Infanti melimella dato, fatuasque mariscas,  
Nam mihi quae nouit pun gere, Chia sapit.*

*Sed ut ingenua est, & honesta laudandi consuetudo,  
ita illiberalis, & indigna bono poeta uituperandi (nisi uitia accuses). Hoc genere etiam continentur Epitaphia, Elogia, Naenia, Treni, Monodia, Epicedia, de quibus paucis, ubi de epigrammate egerimus.*

De conclusione epigrammatis, caput  
decimum.

**H**Oc poematis genus etsi totum illustre, elaboratū industria, perfectum ingenio, studio absolutum esse debet: exitus tamen, & conclusio arguta, & admirabilis expectatur. quæ nouitate, concinnitate, argutia, pondere, sale excitet legentium mentes, & oblectet. Nam quoniam ibi aures, animusque conquiescit, qualis illa est, tale totum iudicatur epigramma. Quod etsi sit frigidum totum, & leue, conclusione tamen acuta, & graui haeret animo. Hoc sit sententia, & dictione, cum structura uerborum grauis est: numerus aptus: membra, dictio, dictionisque syllabae; & tempora. Saepe etiam interrogatione; iuuant, & curta membra, ut uersus punctim, non caesim feriat, ut ait M. Tullius. Interdum enim accidit, ut longioribus membrorum interuallis, & sensuum languescat oratio. Danda ergo accurate opera, ut elaborata sit conclusio. Martialis cum exprimeret dolorem quem Portia uxor Bruti ex interitu coniugis cepisset, ita ut sibi mortem consciscere non dubitaret, cui cum esset remotum ferrum, illa sibi ardentes prunas intra os coniecit, quibus adusta animā efflauit, argute adiunxit in fine  
 J nunc, & ferrum turba molesta nega,

G

Eodem

*Eodem modo cum exposuisset porcellos natos esse ex uulnere matris hasta casu coniecta, cuius ictu & sus mater occubuit, & ea plaga exiere porcelli, adiungit.*

*O quantum est subitis casibus ingenium.*

Sint ne aliqua genera epigrammatis,  
caput undecimum.

**Q**Uod si quaeras an sint genera aliquot epigrammatis, iudicandum hoc certe erit, ex rerum natura de quibus illud componitur. Tot enim epigrammatum sunt genera, quot et rerum, de quibus textitur: sed ut discentium minuamus laborem, fructumque aliquem, & utilitatem studiosis asseramus, tollendus est huiusmodi infinitus ambitus; genera usu frequentiora colligenda sunt. Nam etsi de rebus certis, & definitis, de quibus componantur epigrammata nihil possit praefiniri; assignari tamen quaedam rerum genera usu frequentiora possunt, ut facilius, quo intendimus, cum laude perueniamus. sunt enim usurpata quaedam, & tria magis in quibus etiam nostris magnus est usus: quoniam non possunt, ut dixi, certa genera definiri: quia materiae maxima est diuersitas. quae numero circumscripto includi non potest. Sunt igitur quaedam epigrammata mollia, tenera, uarijs diffusa affectibus, amoris,



amoris, & beneuolentiae; quo in genere laus est. maxima, & decorum languor quidam. exegit enim haec forma animi quasi quandam mollitiem, decore adhibitam. exegit uerba propria; atque hoc in illis ornatissimum, uerba etiam quae diminutiua uulgus uocat, cuiusmodi multa apud Catullum, illud ad Iuuentium

O qui flosculus es Iuuentiorum,

Non horum modo sed quot aut fuerunt

Aut posthac alijs erunt in annis:

Malletem delicias mihi dedisses

Quam isti cui nec seruus est, nec arca,

Quam sic te sineres ab isto amari

Qui non est homo bellus, inquires est.

Sed bello huic nec seruus est nec arca.

Hoc tu quam lubet abijce eleuaque,

Nec seruum tamen ille habet neque arcam.

Et illud ad Iuuentium

Melitos oculos tuos Iuuenti

Si quis me sinat usque basiare,

Usque ad millia basiem trecenta,

Nec unquam saturum inde cor futurum est.

Non si densior aridis aristis,

Sit nostra seges osculationis.

Multa similia de Veranio, & de Lesbia apud eundem poetam. In lusiis uero

*Simpliciter tibi me quodcunque est dicere oportet  
 Natura est quoniam semper aperta mihi.  
 Paedicare uolo, tu uis decerpere poma,  
 Quot peto si dederis, quod petis accipies.  
 Alia sunt acria, uegeta, & uiuida, pleraque apud  
 Martialem, sed nos nonnullorum generum quae ma-  
 gis sunt in usu demonstramus artificium. Unum est ge-  
 nus in quo poetae est proposita foeditas, sed hanc com-  
 ponendi rationem non modo a Rep. Platonis extermi-  
 nandam, sed ut monstrum et portentum maximum in  
 ultimas terras abijciendam puto. Nec enim digni sunt  
 poetae nomine huiusmodi foedi scriptores. castum, in-  
 quit ille, decet esse poetam, piuum, nec lutulentas fues,  
 & spurcos canes imitari conuenit. Quocirca de hoc  
 genere ne uerbum faciemus.*

De secundo genere epigrammatis,  
 caput duodecesimum.

**A**lterum est genus in quos sibi poeta proponit fel,  
 & amarulentiam quasi quandam. sunt in hoc ge-  
 nere frequentes obiurgationes, detrectationes, maledi-  
 cta, uirus quasi quoddam diffusum. In hoc genere bono  
 uiro uersari licet, dummodo sine opprobrijs, & contu-  
 melijs illud exerceat. conuicia uero sint ciuilia, ad de-  
 prauatam

prauatam uiuendi consuetudinem notandam, mores q;  
malos reprehendendos. Catullus in Furium

Furi cui nec seruus est, nec arca,

Nec cimex, nec araneus, nec ignis.

Verum est, & pater, & nouerca; quorum

Dentes uel filicem comesse possunt

Et pulchre tibi cum tuo parente,

Et cum coniuge lignea parentis,

Nec mirum. Bene nam ualetis omnes.

Pulchre conquouitis, nihil timetis;

Non incendia; non graues ruinas;

Non facta impia, non dolos ueneni;

Non casus alios periculorum.

At qui corpora sicciora cornu,

Aut siquid magis aridum est habetis,

Sole & frigore, & esuritione.

Quare non tibi sit bene, atque beate?

A te sudor abest, abest salua,

Muccus que, & mala pituita nasci.

Et quae sequuntur.

Martialis ad Gelliam lib. quinto epigramma-  
te trigesimo.

Si quando leporem mittis mihi Gellia dictis

Formosus septem Marce diebus eris.

Si non derides, si uerum lux mea, narras:

Edisti

*Edisti nunquam Gellia tu leporem?*  
 Ad Gallum eodem libro epigrammate septuagesimoquarto.

*Nunquam me reuocas, uenias cum saepe uocatus,  
 Ignosco nullum si modo Galle uocas.  
 Inuitas alios, uitium est utriusque quod inquis?  
 Et mihi cor non est, nec tibi Galle pudor.*

Eodem libro epigrammate nonagesimoprimum in Ligurinum.

*Occurrit tibi nemo quod libenter  
 Quod quacunque uenis fuga est & ingens  
 Circa te Ligurine solitudo.  
 Quid sit scire cupis? nimis poeta es.  
 Hoc ualde uitium periculosum est:  
 Non Tigris catulis citata raptis,  
 Non Dipsas medio perusta sole,  
 Nec sic Scorpius improbus timetur,  
 Nam tantos rogo quis ferat labores?  
 Et stanti legis, & legis sedenti,  
 Currenti legis, & legis cacanti,  
 In Thermas fugio, sonas ad aurem:  
 Piscinam peto, non licet natare:  
 Ad caenam propero, tenes euntem:  
 A caena uenio, fugas sedentem:  
 Lassus dormio, suscitatus iacentem,*

*Vis quantum facias mali uidere,  
Vir iustus, probus, innocens, timeris.*

**De tertio epigrammatis genere, caput  
decimum tertium.**

**H**ic proxima est alia ratio componendi epigram-  
ma, sed illa re differt, quod quantum fieri potest  
abstinet a maledictis, acumine tamen quasi quodam  
mordet. Totum uidetur comparatum ad excusandū,  
& accusat, uidetur laudare, & uituperat. Genus est  
acutum, mordax, dicax, in eo poeta argute carpit, &  
salse eludit eum, in quem componitur. Qui componit  
nihil minus uidetur uelle, quam ut carpat, id tamen  
acumine quodam praeſtat. Vt Martialis libro secundo  
in Taurum epigrammate sexagesimo sexto.

*Dummodo caufidicū, dum te modo Rhetora fingis,*

*Et non decernis Taure quid eſſe uelis :*

*Peleos, & Priami tranſit, uel Neſtoris aetas,*

*Et fuerat ſerum iam tibi deſinere.*

*Incipe tres, uno perierunt rhetores anno,*

*Siquid habes animi, ſiquid in arte uales.*

*Si ſchola damnatur, fora litibus omnia ſeruente,*

*Ipfē poteſt fieri Marſia cauſidicus.*

*Eia age rumpe moras, quo te expectabimus uſque*

*Dum*

*Dum quid sis dubitas, iam potes esse nihil.*  
 Eodem libro epigrammate sexagesimonono  
 in Classicum.

*Inuitum caenare foris te Classice dicis,*

*Si non mentiris Classice, dispeream.*

*Ipse quoque ad caenam gaudebat Apicius ire,*

*Cum caenaret erat tristior ille domi.*

*Si tamen inuitus uadis, cur Classice uadis?*

*Cogor ais, uerum est, cogitur & Silius.*

*En rogat ad caenam melior te Classice rectam,*

*Grandia uerba ubi sunt? si uir es, ecce nega.*

Et illud in Velocem.

*Scribere me quereris Velox epigrammata longa,*

*Ipse nihil scribis, tu breuiora facis.*

De quarto genere epigrammatis, caput decimumquartum.

**F**orma quarta est tota sale condita, & iucunda,  
 urbanitate lepida, & uenusta. In hoc genere requi-  
 ritur falsus quidam, & urbanus lepor, qui sensus ani-  
 mi iucunditate quadam perfundat, risumque moueat,  
 non nimia dicacitate, nec mordacitate. Vitantur hic  
 contumeliosa uerba, absunt maledicta, & quae foede,  
 & sine decore fiunt; ad risum comparantur non ad  
 inferendam

*inferendam iniuriam; sed ad iocum & ludum. Ut  
Martialis libro tertio epigrammate uigesimo in-  
quit, quid agat Canius, & tandem concludit illum nihil  
aliud agere quam ridere.*

*Dic Musa quid agat Canius meus Rufus?  
Virum ne chartis tradit ille victuris,  
Legenda temporum acta Claudianorum?  
An quae Neroni falsus astruit scriptor?  
An emulatur improbi iocos Phaedri?  
Lasciuus elegis an seuerus Herois?  
An in cothurnis horridus Sophocleis?  
An otiosus in schola poetarum?  
Lepore tinctos Attico sales narrat?  
Hinc si recessit porticum terit templi,  
An spatia carpit lentus Argonautarum?  
An delicatae sole rursus Europae,  
Inter tepentes post meridiem buxos,  
Sedet ambulat-ve, liber acribus curis?  
Titi ne thermis, an lauatur Agrippae?  
An impudici balneo Tigillini?  
An rure Tulli fruitur, atque Lucani?  
An Pollionis dulce currit ad Quartum?  
An aestuantes iam profectus ad Baias?  
Piger Lucrino nauiculatur in stagno?  
Vis scire quid agat Canius tuus? ridet.*



Libro undecimo in Parthenopæum epigramma  
te octuagesimoseptimo.

*Leniat ut fauces medicus, quas aspera uexat  
Assidue tussis, Parthenopæe tibi.  
Mella dari, nucleos quæ iubet, dulces quæ placentas,  
Et quidquid pueros non sinit esse truces.  
At tu non cessas totis tussire diebus,  
Non est hæc tussis Parthenopæe, gula est.*

De quinto genere epigrammatis, caput  
decimum quintum.

**C**omponuntur quædam epigrammata quinto gene-  
re, ea ratione, ut sibimet instent, tota sint den-  
sa, conferta, & multiplicia: quando ita singulis qui-  
bus quæ locis, & partibus res grauitè, & acute conse-  
runtur, ut quouis loco, & quauis parte sententia ter-  
minari, concludique possit. Deducitur uero ut senten-  
tia semper crescat. Hoc ingenij felicibus usu euenit.  
non quibuscunque. Nam magno artificio opus est, sin-  
gulari acumine, & prudentia. Ego & si non unum uel  
alterum qui omnes numeros in hoc genere expleat re-  
perio colligam certe aliquod apud Martialem, ex qui-  
bus tu quid tibi in huiusmodi forma præstandum sit  
intelligas. Martialis lib. I. epigrammate 90. de Gellia.

*Amissum*

*Amisſum non flet cum ſola eſt Gellia patrem ,  
 Cum quis adeſt iuſſae proſiliunt lacrymae .  
 Non luget quiſquis laudari Gellia quacrit ,  
 Ille dolet uere qui ſine teſte dolet .*

Eodem libro epigrammate centefimo undecimo ad Olum .

*Cana eſt barba tibi , nigra eſt coma , tingere barbam  
 Non potes , haec cauſa eſt , ſed potes Ole comã .*

Venuſtum illud centefimum quinquageſimum quartum de Catella Publij .

*Iſſa eſt paſſere uequior Catulli ,  
 Iſſa eſt purior oſculo columbae ,  
 Iſſa eſt blandior omnibus puellis ,  
 Iſſa eſt carior Indicis lapillis ,  
 Iſſa eſt deliciae catella Publi ,  
 Hanc tu ſi queritur , loqui putabis ,  
 Sentit triſtitiãque , gaudiumque ,  
 Collo nexa cubat , capitque ſomnos ,  
 Ut ſuſpiria nulla ſentiantur ;  
 Et deſiderio coacta uentris ,  
 Gutta pallia non ſeſellit ulla ,  
 Sed blando pede ſuſcitãt , toroꝝque  
 Deponi monet , & rogat leuari ,  
 Caſtae tantus ineſt pudor catellae .  
 Ignorat Venerem , nec inuenimus*

Dignum tam tenera uirum puella .  
 Hanc ne lux rapiat suprema totam  
 Pictam Publius exprimit tabella ,  
 In qua tam similem uidebis Iffam ,  
 Ut sit tam similis sibi nec ipsa ,  
 Iffam denique pone cum tabella ,  
 Aut utramque putabis esse ueram ,  
 Aut utramque putabis esse pictam .

De sexto genere epigrammatis , caput  
 decimum sextum .

**E**st hoc genus nobile , & magnificum , generosum ,  
 & splendidum , absolutum prudentia quadam ,  
 & aequalitate plenum : in quo cum grauitate uenu-  
 stas miscetur : acumen cum lenitate temperatur : nu-  
 merus quasi ibi natus uidetur , non aliunde eo defle-  
 xus : non translatus ambitiose , aut labore quaesitus .  
 In quo semper usque ad extremam conclusionem le-  
 gentis animus est suspensus ; cuius desiderium exple-  
 tur sententia excepta . Conditur enim ex quaesita qua-  
 dam argutia , & numerofo dicendi genere perficitur .  
 In eo respondent aut partes partibus , aut extrema con-  
 clusio superioribus omnibus . Ut illud in lusibus .

Cur obscaena mihi pars sit sine ueste requiris ,

Quaero

Quaero tegat nullus cur sua tela Deus?  
 Fulmen habet mundi dominus tenet illud aperte,  
 Haec datur aequoreo fuscina tecta Deo?  
 Nec Mauors illum, per quem ualet, occulit ensen,  
 Nec latet in tepido Palladis hasta sinu.  
 Num pudet auratas Phaebum portare sagittas?  
 Clam ne solet pharetram ferre Diana suam?  
 Num tegit Alcides nodosae robora clauae?  
 Sub tunicam uirgam, num Deus ales habet?  
 Quis Bacchum gracili uestem praetendere Thyrsos?  
 Quis te celata cum face uidit Amor?  
 Nec mihi sit crimen quod mētē la semper aperta est,  
 Hoc mihi si telum desit inermis ero.

**Martialis uero de amphitheatro Domitiani.**

Barbara Pyramidum sileat miracula Memphis,  
 Assiduus iactet nec Babylona labor.  
 Nec Triuiac templo molles laudentur honores,  
 Dissimuletque Deum cornibus ara frequens.  
 Aere nec uacuo pendentia Mausolea  
 Laudibus immodicis Cares in astra ferant.  
 Omnis Caesareo cedat labor amphitheatro.  
 Vnum pro cunctis fama loquatur opus.

De septimo

De septimo genere epigrammatis, caput  
decimum septimum.

Septimum genus est amatorium molle, & placidū,  
 Quod influat in sensus & moueat. Non tamen a-  
 met turpitudinem, fugiatque illam obscaenitatem,  
 quam de industria sectati sunt plerique spurci, & foe-  
 di homines, in componendo. qui sua turpitudine sese  
 indignos effecerunt, qui ab ingenuis legantur. Re-  
 spuunt enim aures castae, & honestae huiusmodi ef-  
 frenatam libidinem, & hanc immoderatam impuden-  
 tiam detestantur. Nam huiusce faciditatis auctores, nō  
 modo ex hominum societate expellendos putabat diui-  
 nus Plato, sed pestes Reip. & carnifices iuuentutis  
 uocabat. Quod & bonorum morum hostes, & casti-  
 moniae, integritatis, uerecundiae depopulatores quasi  
 quidam essent. Archilochum ob hanc foeditatem Athe-  
 nienses de patria exterminarunt: Ouidium haec prae-  
 clara doctrina in exilium perpetuū relegauit. obscaeni  
 itaque & ab honestate alieni uersus non solū uiri Chri-  
 stiani auribus sunt indigni, sed nobilis, & liberaliter  
 educati, famae & dignitati perniciosi. Tu si me audis,  
 abstine, ne si turpibus insistas turpis ipse euadas. epi-  
 grammata turpia, obscaena, inhonesta, ut scopulum cui  
 tabis componendo: leges ut linguae candorem, nito-  
 rem

rem uersuum, numerorum uarietatem, in ueteribus notes; quoniam alia ipsorum fere non habemus. Quae inopia bonorum exemplorum efficit, ut ego ipse qui non modo turpia fugienda esse admoneo, sed ea etiam quae uel solam umbram habeant obscaenitatis relinquenda, utar aliquando in exemplis, quod noua afferre indignum iudico, uetera uix possum meliora colligere quam ea in quibus turpitudinis insit species. quod illi uidelicet in ea fuerunt ingeniosi in quo nobis perniciosos esse uidemus. Elige potius congruentem conuenientemque uitam, honestati instituere sine ijs, quam illis ducibus turpitudinem, foeditatemque prae te ferre. Corrumpuntur enim huiusmodi carminibus mores, uita deprauatur, homines pecudibus similes efficiuntur. Quid enim aliud quisque sit, quam id cuius uel lectioni studet, uel studio delectatur? Componantur tamen in hoc genere epigrammata, quae sint liberalia & ingenua, sint uerecunda, modesta, candida, culta, tersa, mollia, affectuum plenissima, & quam uariius est amantium affectus, tam uaria sint ipsa. Sint interdum mutila, & deficientia. Nam maxima amantis sapientia est, nonnunquam una amentia; quae exprimitur in epigrammate, dum uel sententiae deficiunt, uel sunt mutila, uel repetuntur. Cum uaria desideria exponuntur, multiplices, et cōtinuae cogitationes, somnia, uisa, praesagia,

*praesagia, collocationes fictae. Cauendum tamen est diligenter, ne sint frigida, languida, inculta, puerilia. Multa sunt apud Catullum huius generis, praeclara multa apud Martialem. Nam est hoc genus uarium & in eo poetarum antiquorum multa fuerunt praeclara. de quibus, quia sunt pleni libri scribendis exemplis supersedeo.*

De octauo genere epigrammatis, caput  
decimumoctauum.

**Q**uoddam est genus iucundissimum, acutum & facetum, cum Echo in fine uersuum respondet, uel in medio, & sententiam uel illustrat eandem; uel diuersam exorditur. In hoc genere Latini fuerunt feliciores Graecis. Hoc compositionis genere poeta sibi magnam auditorum attentionem comparat, et uoluptatem efficit non mediocrem. In hoc genere illud est elegans, quoties extrema etiam uerba mutantur, & expectatio auditoris diuersa conclusione deluditur. uerbi gratia si sint nobiles non respondeat biles, sed uiles. Nam hoc modo uersus terminatur suauius. Qua nouitate maiorem inuentionis laudem consequitur poeta si concinne id efficiat, quam si ueteres imitando sequi studeat. Est illud elegans ueteris poetae: multa similia circumferuntur.

Quae



Quae celebrat Thermas Echo, et stagna alta Neronis  
Deludit uoces concava saepe meas.

Saepe hic Narcissum expecto simul illa moratur,

Si queror; haec queritur, si gemo, & illa gemit.

Quis nam clamor? amor. quis nam furor? uror.

Echo quae grauior paena in amore? mora.

Expectas Narcissum? ipsum. quae causa morandi?

Orandi, Num isthaec dicta notabit? abit.

Ad fuerat? fuerat. ne isthic? hic. quem fugit iste?

Is te. etiam me? Me. quod malum amare? mare.

Non ueniet? ueniet. quae spes? aes. Vincitur auro?

Auro. Victor ero prodigus aeris? eris.

Sunt pueri fragiles? Agiles. ui muneris? aeris.

Quis docet hoc? Echo, cum bene clamat, Amat.

Habetur etiam illud genus falsum, ornatum, & urba-

num, cum res aliae, ex alijs quasi subordinantur cum

novitate aliqua. Quae nouitas mutati uerbi, uel syll-

bae, uel litterae habet leporem, ut illud.

Spernitur haereticis, pietasque, fidesque, Deusque,

Cur? quia non aliud uiuere, quam bibere est.

Illud hoc loco non puto esse praetermittendum, non es-

se uidelicet conuertendos numeros ad allusionem nomi-

nis. Quoniam nihil est stultius, nihil ineptius eo stu-

dio, cum habeas animi, corporisque dotes, & campum

latissimum uirtutum, in quo possis euagari, & excur-

re.

I

rere.

rere. Nam facta argumentum suppeditant, res gestae, aetas, munia, dignitas, generis antiquitas, nobilitas, dicta, consilia, ornamenta alia, in quibus praedicandis finem non inuenies. Aliquando tamen ad uituperandum non inepte licebit uti, ut Ovidius

At cur non dicam Furia, te Guriam?

### De epitaphio caput decimumnonum.

Sunt praeterea quaedam genera epigrammatis, quae Epitaphia dicuntur: quae fere in exornatione sunt posita. Est autem epitaphium inscriptio, quae in sepultura fit, quae docet, cuius ossa tegantur ea mole, quod eius plerumque nomen aetas, dignitas, munus, facta, & huiusmodi alia. More ueterum indicat Virgilius.

Et tumulum facite, & tumulo superaddito carmen.

Daphnis ego in silvis hinc usque ad sidera notus. Epitaphium autem prius fuit oratio funebris, quae praecelara facinora, & res bene pro patria gestas uiri alicuius demortui, aut demortuorum aliquorum declarabat publico praeconio, quae habebatur ad tumulum uita functorum. Huiusmodi epitaphium extat apud Thucydidem, scriptum etiam reliquit epitaphium, siue funebrem orationem Diuinus Plato, quam ipse composuit in funere eorum, qui ob patriam obierunt. Illa adeo

adeo probata fuit omnium consensu, ut institutum fuerit quotannis eam publice recitari. Haec oratio more ueterum modo uersu constabat, & dicebatur carmen inferiarum; siue parentalia; modo soluta oratione, & funebris oratio appellabatur. Nos hodie ea, quae ad sepulturam in demortuorum interitum componuntur epitaphia nominamus, siue illud incidatur, siue in librum referatur. Eius materia diuersa ratione tractatur, diuerso modo. pro imperatore, pro exercitu, pro Rege, pro publico magistratu, pro puero, pro sene, pro adulto, pro foemina: proprie, & apte accommodandum est. Aliquando per exclamationem: modo per interrogationem, ut nosmetipsos rogemus; ut expectemus responsionem; deinde percontemur alia: Vt loquamur cum urna, siue tumulo; petamus à nobis ipsis rationem consilij nostri, significemus interdum quid nos loqui, quid silere cogat; quo dolore afficiamur: quod officium exigit, & uirtutes demortui postulent, loqui nos: quamuis impediatur luctus. Decet inuehi in mortem, in causam interitus: si pestis, si bellum, si casus, si aqua, si ignis, si mare, si ager, si uilla: licet excurrere in pericula detestando, accusando Parcas, in aetatem, in tempus, in Persephonen, in Ditem, in Solem, qui aspexit, & passus est; in lunam, in diem, qui non obduxit omnia nebulis; in partem anni, aetatem, hiemem &c.

*Consolari conuenit propinquos, amicos, socios: polliceri uitam beatam; precari quietem, gaudium, uitam perpetuam. Alloqui interdum saxum, tumulum, uia-  
torem, lectorem, amicum quempiam, patriam, domum, familiam, & sic de ceteris. Nonnunquam colloquemur cum posteritate, ut non obliuiscatur laudis illius; & famae: accusabimus fortunae inconstantiam. Si sapiens, qui uita est functus, alloquemur Musas; Apollinem; Minervam; Montes sacros Musis, fluuios, et patriae flumina; ut si Romanus, Tiberim; si Florentinus Arnum, si Neapolitanus Sebethum; Si miles, Martem, Bellonam; si sacerdos, antistes, uir iustus, pietatem, religionem, fidem, uirtutes omnes: si nauis mare, & maris omnia; & sic de ceteris. Demon-  
strabimus bonas, quibus demortui perfruantur in beatorum contubernio; quid in terris consequantur, honores, titulos, famam, memoriam sempiternam. Decla-  
rabimus studia, aetatis gradus, dotes animi, facta, ingenium. Haec in uniuersum dicta sunt, unde petatur argumentum componendi epitaphium. Sed praecipuas epitaphij partes assignemus. Eae sunt potissimum ludus, laudes, consolatio, exhortatio, explicatio damni, & iacturae; amplificatio rerum, ut desiderium amissi augeatur: addenda tamen consolatio. Fuerunt ueterum simplicissima epitaphia nonnunquam, culta, & ele-  
gantia.*

gantia. Illud poetæ Pacuuij.

Adolescens tametsi properas, hoc te saxum rogat  
Ut se aspicias, deinde quod scriptum est legas.

Hic sunt poetæ Pacuuij Marci sita

Offa: hoc uolebam nescius ne esses: Vale

Illud Plauti.

Postquam est morte captus Plautus

Comoedia luget; scena est deserta,

Deinde risus, ludus, iocus quæ & numeri,

Innumeri simul omnes collacrymarunt.

Illud Virgilij.

Mantua me genuit, Calabri rapuere, tenet nunc

Parthenope, cecini pascua, rura, duces.

Illud Diogenis Cynici, cuius signum sepul-  
cræ appositum, erat canis.

Dic canis hic cuius tumulus? Canis. At canis hic quid est?

Diogenes. Obijt? Non obijt, sed abiit.

Diogenes cuius pera penus: cui dolia sedes

Ad manes abiit? Cerberus ire uetat.

Quonam igitur? clari flagrat qua stella leonis,

Additus est iuxta nunc canis Erigonæ.

Illud etiam non ignobile D. Alfonsi Auall

Marchionis Piscarij.

Quis iacet hoc gelido sub marmore? Maximus ille

Piscator, belli gloria, pacis honos.

Num

Num quid et hic pisces cepit? nō. ergo quid? Vrbes,  
 Magnanimos reges, oppida, regna, duces.  
 Dic quibus haec cepit Piscator retibus? alto  
 Consilio, intrepido corde, alacrique manu.  
 Qui tm̄ rapuere ducem? duo numina Mars, Mors.  
 Ut raperent quidnam compulit? Inuidia.  
 Nil nocuere tamen, uiuit nam fama superstes,  
 Quae Martem, & Mortē uincit, & Inuidiā.

## De Nænia caput uigefimum.

**E** Pitaphij nomine complectebantur ueteres Næniā,  
 quo nomine deam funerum, etiam appellabant,  
 ut Festus, & D. Augustinus docent. Dicebatur ue-  
 ro Nænia epitaphium, seu carmen, quod ad rogam ca-  
 nebatur, si uero sepulturae scriberetur, epitaphium. In  
 Nænia multa dicebantur de eo, cuius combureretur  
 corpus, more ueterum, uel tegeretur sepultura, quae  
 ad commendationem, ad lamentationem, & luctum  
 facerent. Sit illud optimū Næniae exemplum in quar-  
 to Aeneidos. Ubi Dido antequam sese in rogam conij-  
 ciat, sibi carmen lugubre concinit, quod quemuis uel  
 ferreum facile moueat.

Dulces exuiuae, dum fata, deusque sinebat,  
 Accipite hanc animam, meque his exoluite curis.

Vixi,

Vixi, & quem dederat cursum fortuna peregi,  
 Et nunc magna mei sub terras ibit imago.  
 Urbem praeclaram statui, mea maenia uidi,  
 Vltæ uirum paenas inimico a fratre recepi,  
 Felix, heu nimium felix, si litora tantum  
 Nunquam Dardaniae tetigissent nostra carinae.  
 Dixit, & os impressa toro, moriemur inultae?  
 Sed moriemur ait. Sic sic iuuat ire sub umbras.  
 Hauriat hunc oculis ignem crudelis ab alto  
 Dardanus, & nostrae secum ferat omina mortis.

### De Epicedio caput uigefimum primum.

**E**picedium erat carmen, quod pronuntiabatur in  
 exequijs dum soluerentur iusta. Nam ut scribit  
 Ammonius Epicedia sunt, quae laudem demortui con-  
 tinent cum commiseratione. Dicitur uero Epicedium  
 corpori non dum sepulturae mandato, quod semel tan-  
 tum pronuntiatur, Epitaphia uero etiam anniuersaria  
 erant, ut Athenis, ut & Artemisiae imperio, ad Mau-  
 soleum mariti fiebat quotannis. Sit Epicedij exem-  
 plum illud in nono libro Aeneidos, ubi mater cadauer  
 filij Euryali alloquitur.

Hunc ego te Euryale aspicio? tunc ille senectae.  
 Sera meae requies? potuisti relinquere solam.

Crudelis?



*Cradelis ? nec se sub tanta pericula missum  
 Affari extremum miserae data copia matri ?  
 Heu terra ignota , canibus data praeda Latinis ,  
 Alitibusque iaces : nec te tua funera mater  
 Produxi : pressi ve oculos , aut uulnera laui .  
 Hæste tegens , tibi , quam noctes , festina dies que  
 Urgebam , & tela curas solabar aniles .  
 Quo sequar ? aut quæ nunc artes , auulsaq; mēbra  
 Et funus lacerum tellus habet ? hoc mihi de te .*

*Nate refers ? hoc sum terræque , marique secuta ?  
 Simile illud in extremo decimo , ubi Mezentius de-  
 plorat Lausi interitum ; & in undecimo , ubi uel Ae-  
 neas , uel Euander deplorant Pallanta immatura mor-  
 te præceptum : quæ non adiungo ne sim multus , Nō-  
 nunquam in Epicedio est permixtum elogiū , ut eo loco .  
 Te nemiſ Angitiæ , uitrea te Fucinus unda ,  
 Te liquidi fleuere lacus ? Quando uero ad tumulum  
 recitabatur , iam non Epicedium ; sed Epitaphium no-  
 minabatur , ut illud Catulli ad fratris tumulum .*

*Multas per gentes , & multa per æquora uectus ,  
 Aduento has miseras frater ad inferias ,  
 Ut se supremo donarem munere mortis ,  
 Et mutum nequicquam alloquerer cinerem .  
 Quandoquidem fortunā mihi sese abstulit ipsum ,  
 Heu miser indigne frater , adempte mihi .*

Nunc

Nunc tamen interea prisco, quae morè parentum  
 Tradita sunt tristes munera ad exequias,  
 Accipe fraterno multum manantia fletu,  
 Atque in perpetuum frater aue, atque uale.

De Monodia, caput uigesimalium secundum.

**M**onodia item in funere intelligebatur. erat autè  
 carmen lugubre, quod ab aliquo uoce subtristi  
 canebatur ad mouendos affectus, & eliciendas lacry-  
 mas. Nec tamen idem est cum Threno de quo mox di-  
 cemus; fuit enim Monodia quoties unus prodibat in  
 medium, qui defuncti memoriam uoce moesta, & lugu-  
 bri carmine prosequeretur; idque uel ad tibiam fiebat,  
 uel uersu musicorum modulis temperato. Quod exem-  
 plum subijciam non inuenio, nisi ex choro Tragoediae  
 desumam, ut illud apud Senecam in Hippolyto.

Huc huc reliquias uehite cari corporis  
 Pondusque, & artus temere congestos date.  
 Hippolytus hic est? facinus agnosco meum,  
 Ego te peremi, neu nocens tantum semel  
 Solus ue fierem facinus ausurus parens,  
 Patrem aduocaui: munere en patrio fruor.  
 O Triste fractis orbitas annis malum,  
 Complectere artus, quodque donati est super,

K Mife-

*Miserande moesto pectore incumbens forte .  
& quae sequuntur .*

*De Threno caput uigesimum tertium .*

**T**hrenus Latine sonat luctus; fuit genus carminis,  
quo deflebant ueteres euerfionem urbium, ut in  
diuinis litteris uatem sanctissimum uidemus deflere ca-  
sum acerbum ciuitatis sanctae. Sed usus etiam latius  
patet, ut ex inuentione intelligimus. Nam ut docet Pau-  
sanias, cum Herculi succenseretur huius doctor, quod  
uidelicet discipulus ineptior ad discendum esset; ille ita  
commotus ingrato animo in doctorem saeuijt, atque in-  
teremit; Ceteri Lini auditores carmine lugubri perem-  
ptum doctorem deplorarunt. Id genus carminis usur-  
parunt deinde praeficae, quae deplorandis uita fun-  
ctis uictitabant. Habebant namque compositum car-  
men accommodatum omnibus funeribus; quod cuius  
funeri accommodabant. Mutatis enim nominibus ui-  
ta functorum, & familiarium proprium faciebant. Vi-  
get hodie is mos in Sicilia, & peruersa inueterauit con-  
suetudo. Nam praeficae, pretio conducuntur, ut prae-  
cinent uoce lugubri, quaedam carmina, ad quae eiula-  
tu, & fletu cognati, & propinqui defunctorum respon-  
deant. Quam consuetudinem tamen, ut indignam ijs,  
qui

*qui aeternam, in mortalem uitam esse confitentur sustulit lege Praetor optimus Ioannes Vega : quamuis deprauata licentia lege coerceri iure ad hanc diem potuit. Canebatur item Threnus in ipsa calamitate ab ancillis antequam cadauer terrae mandaretur, postea etiam quam conditum esset ; & anniuersarijs inferijs .*

De Elogio, caput uigesimumquartum.

**E**Logium etiam dicebatur, quoties sententia aliqua numeris includebatur in commendationem, uel de testationem alicuius personae . Siue celebre aliquod dictum dignum memoria, quae alicuius contineret laudem, uel uituperationē ; ut Marcus Tullius, & Quintilianus docent. Refert illud Marcus Tullius in libro de Senectute . Solonis quidem sapientis Elogium est, quo se negat uelle suam mortem dolore amicorum, lamentis quae uacare . In prima uero quaestione Tusculana . Quid ipsa sepulcrorum monumenta ? Quid elogia significant, nisi nos futura cogitare . Elogium uero etiam est honoris significatio, quae ex poetae opinione, & iudicio proficiscitur, quale illud apud diuinum poetam in nono libro, de Niso, & Euryalo .

*Fortunati ambo, si quid mea carmina possunt,*

*Nulla dies unquam memori uos eximet aeuo :*

*Dum domus Aeneae Capitoli immobile saxum  
 Accolet : imperiumque pater Romanus habebit .  
 In detestationem illud in octauo libro Aenea-  
 dos de Caco.*

*--- Nequeunt expleri corda tuendo .  
 Terribiles oculos , uultum , nullo saque setis  
 Pectora scmiferi , atque extinctos faucibus ignes .  
 Est illud simplicissimum Eloquentium in imagi-  
 ne Ennii poetae .*

*Aspicite o ciues senis Ennii imaginis formam ,  
 Hic cecinit uestrum maxima facta patrum .  
 Illud compositum magis , & uenustum in li-  
 bro secundo Aeneidos de Priamo .*

*--- hic exitus illum  
 Sorte tulit Troiam incensam , & prolapsa uidentē  
 Pergamā , tot quondam populis , terrisq; superbū  
 Regnatorem Asiae , iacet ingens littore truncus  
 Auulsumq; humeris caput , & sine nomine corpus .  
 Nec uero locum elegantiores possum proferre , quam  
 illum diuini poetae , in quo elogium complectitur in lau-  
 dem filij , & detestationem parentis Mezentij .  
 Filius huic iuxta Lausus , quo pulchrior alter  
 Non fuit excepto Laurentis corpore Turni .  
 Lausus equum domitor , debellatorque ferarum  
 --- dignus patrijs , qui laetior esses*

*Imperijs ,*

Imperijs, & cui pater haud Mezentius esset.

De Aenis, caput uigesimumquintum.

**V**etustissimum fuit Epigrammatis genus, quod Hesiodus Aenum uocauit, in quo inessent fictiones, & quasi quaedam picturae, & rerum imagines, Cum aliud aperte prae se ferunt, aliud uero significat, & tacite profitentur, ut illud Horatii ad Brutum ode decimaquarta libro primo.

O naui referent in mare se noui.

Fluctus; ò quid agis fortiter occupa

Portum: nonne uides ut

Nudum remigio latus,

Et malus celeri saucius Africo

Antennae quae gemant? ac sine funibus

Vix durare carinae

Possint imperiosius

Aequor? Non tibi sunt integra linea,

Non dii, quos iterum pressa uoces malo.

Quamuis pontica pinus

Siluae filia nobilis,

Factes & genus, & nomen inutile:

Nil pictis timidus naui puppibus

Fidit: tu nisi uentis

Debes

*Debes ludibrium caue ,  
 Nuper sollicitum , quae mihi tedium ,  
 Nunc desiderium , curaque non leuis ,  
 Interfusa nitentes  
 Vites aequora Cycladas .*

*Huc etiam referunt ea Epigrammata , in quibus non modo animalia rationis , sermonisque expertia loqui fingimus , sed etiam uestes , enses , arma , ornamenta , instrumenta artium , & alia huiusmodi . Sed in his omnibus Epigrammatum generibus leges uetustatis obseruandas censeo ; quas in ueterum monumentis , & scriptis uidemus ; illud tamen animaduertamus , ut quam simplicissimo charactere , & forma deducamus rei gestae narrationem , uictoriae , familiae , patriae , & hanc puritatem nullo ambitionis studio custodiat diligenter , qui laudem uult consequi .*

### De Palinodia , caput uigesimum sextum .

**P**alinodeiam primus dicitur composuisse Stesichorus poeta Siculus . Erat autem Palinodia certum genus epigrammatis , siue epigramma totum in laude consumptum . Nam cum prius aliquem uituperasset poeta , cuius scriptionis eum penitusset , recantabat iterum , & eum , quem accusarat , laudabat rursus , & quae probra



probra coniecerat, eleuabat commendando, reuocabat-  
 que sententiam negando quod assertum fuerat prius.  
 Tale illud apud Horatium ode decima sexta lib. primo.

O matre pulchra filia pulchrior,  
 Quem criminosis cunque uoles modum  
 Pones fambis, siue flamma  
 Siue mari libet Adriano?

Non Dindymene, non adytis quatit  
 Mentem sacerdotum incola Pythius.  
 Non liberaeque, non acuta

Sic geminant Corybantes aëra.

Tristes ut irae: quas neque Noricus  
 Deterret ensis, nec mare naufragum,  
 Nec saeuus ignis, nec tremendo

Jupiter ipse ruens tumultu.

Fertur Prometheus addere principi

Limo coactus particulam undique

Defectam, & insani Leonis

Vim stomacho apposuisse nostro.

Frae Thyesten exitio graui

Strauere, & altis Urbibus ultimae

Stetere causae, cur perirent

Funditus; imprimeretque muris

Hostile aratrum exercitus insolens

Compesce mentem me quoque pectoris

Tentaui

Tentaui in dulci iuuenta  
 Feruor, & in celeres iambos  
 Misi furentem; nunc ego mitibus  
 Mutare quaero tristitia, dum mihi  
 Dum mihi fias recantatis amica  
 Opprobrijs, animumque reddas.

Haec, & huiusmodi ad Encomia reducuntur ut Paca-  
 nes, & scolia, de quibus alio loco, ut institutum ab-  
 soluamus.

De ijs rebus, quibus perfectum fiat epigramma,  
 caput uigesimumseptimum.

**P**erficitur epigramma, & absoluitur suis numeris,  
 ut quodcunque aliud poematis genus, duplici ra-  
 tione, imitatione, & iudicio: quae tamen inter se co-  
 pulata, non disiuncta intelligi uolo. Haec enim duo con-  
 iuncta inueniantur, necesse est in eo, qui sit compositu-  
 rus. Nam ijs duobus uniuersum fere negotium absol-  
 uitur: cum ut imitemur, tum ut statuamus quid, &  
 quatenus imitari debeamus: quae uel sit forma imita-  
 di eligenda. Hoc fieri non potest quin prius poetam  
 probemus, & imitandi speciem, siue ideam hanc, uel  
 illam, & praestantissimam, & ingenio nostro accom-  
 modatam, naturaeque aptam iudicemus. Quamuis  
 enim

enim primi, quem sequerentur non habuerint, nobis tamen tantopere est necessaria imitatio, & expetenda, ut sine ea uix poetae nomen suffurari possimus. Nec enim hac tempestate illo studio, & contentione, qua ueteres, indagamus componendi rationem, & formam eligimus: sed quasi aliud agentes, operam uel exigua ponimus in eo studio, in quo illi omne tempus, & aetatem collocabant. Adde quod inconstantia fortunae impeditur, temporum aduersa conditione, iniquis uicissitudinibus rerum. Nec inuitamur ijs praemijs, quibus illi, nec eo in honore est poetica, quo apud antiquos fuisse accepimus. Peregrini praeterea in linguam Latinam incidimus non modo qui extra Italiam, sed qui in ipsomet Latio nati educatique sunt. Quod si aurea illa, & florentissima Romani sermonis quasi aetate, cum linguae dignitas suam est quasi maturitatem consecuta, veteres illi singulari ingenio, & doctrina uiri nihil aggrediebantur sine imitatione: Nos hospites, & oscitantes sine ea quidquam magnopere admirandum posteris posse nos relinquere arbitrabimur? Nonne bonus ille, & urbanus poeta, qui imitatores seruum percus uocat, & imitandi studium improbare uidetur, nonne inquam, is ipse sine imitatione ueterum putat nihil laudabile posse fieri? Nonne ijs praecipit in arte poetica ut nocturna, & diurna uerset manu auctorum Grae-

corum uolumina is, qui aliquid admiratione dignum uult componere? Ille idem primum in ijs spatijs constitit, in quibus pedem posuerat Lucilius: ac uix ille uestigia impresserat, cum hic eisdem impressionibus gradum fixit. Epistolae uero composuit more Theognidis, & Phocyllidae. In lyricis nemo negat illum pedem ab imitandi ratione dimouisse; quod declarant loci innumeri de Graeco in Latinum sermonem mutati; ut per quos profecerat, admoneret per eosdem nos proficere posse, si ut ille, nocturna uersaremus manu, uersaremus diurna exemplaria Graeca. Sed in primis iudicium adhiberi conuenit in eo, ut optima quaeque seligamus ad imitandum: Ubi uero composuerimus, ea quasi peregrina perpendamus, & aestimemus perinde ac si essent aliena. Videndum igitur diligenter est, quomodo ueteres animi sensa exposuerint; quae poetica iudicauerint; quae non: quo ordine, quibus luminibus, & figuris, quibus numeris, qua longitudine, qua ratione, & in singulis accommodemus epigramma nostrum. Illi paruis carminibus sententias exiguas item includunt, nos decorum inspicientes seruemus. Illi alia Iambicis, alia Hendecasyllabis, alia alijs numeris sunt complexi; conemur nos proxime accedere, & bonos quosque imitando adaequare, si laudem consequi uolumus. sed de numeris deinde pauca erunt subiungenda.

Quomodo

Quomodo sit expoliendum epigramma,  
caput uigefimumoctauum.

**A**nimus censoris uult Horatius, sumat, qui recte  
corrigen debet epigramma, & quoduis poema,  
& illud laudat in Quintilio Varo, quod ille multa  
aliter esse efferenda diceret, quam quae primo illo ar-  
dore animi, & quasi impulsu protulisset; quod si corri-  
gi uersus, & sententia non poterat; honestius iudica-  
bat expingi omnino; quam in quo uitij aliquid inesset,  
praetermittere; atque ideo delere iubebat. Diligen-  
ter igitur curandum est, ne nos ille amor nostrarum lu-  
cubrationum, & scriptio num decipiat, efficiatque ut  
illa probemus, quae alioqui uitiosissima sunt. Nā sunt  
ueluti quidam ingenij partus, ea, quae componis; ut  
uero beneuolentia in liberos efficit, ut multa, quae in  
alijs non toleraremus, in ipsis patiamur, laudemus, ef-  
feramus. Et qui alioqui turpes sunt, & foedi nobis  
formosissimi uidentur: ita nostrarum scriptio num ge-  
stiens uoluptas, & amor plerunque nobis aciem men-  
tis perstringit, ut ne errores quidem grauissimos uidea-  
mus: qui in alijs ne excusationem quidem ullam acci-  
pere uelimus. Cogitet igitur qui suum expolit epigram-  
ma, illud exagitandum esse, & aestimandum alia tru-  
tina, & statera, quam ea, quam adhibeat sui amor.

Exagitet ergo ; & emendet, expoliat ; limet : Multo enim est satius nos nostra studio, & diligentia corrigere, perfecta quae reddere industria, & labore, quam ut morosi lectores insectentur, uituperent, dilacerent. Hoc ut assequamur praestat ubi composuerimus remouere aliquandiu, & asseruare dum ille animi ardor deserue scat : qui nostra nobis commendat, nec sinit uitia uidere. Deinde uero ea ut si alicuius essent inimici insectemur, notemus inuentionem, dispositionem, & ordinem, uarietatem, locutiones, numeros, ieiunitatem, superflua, & quae uitiosa iudicauerimus conemur remouere. Quam apte, quam proprie dicantur animaduertamus : ne amplificare uolentes imminuamus, uel contra ; applicemus omnia, perseueremus in similitudine ; & in metaphora ; in argumento ne misceamus multa aliena, ne ex quouis genere florum texamus corollas ; sed omnia aequa bilance examinemus : & quae in alijs aut non probamus, aut non patimur, in nobis ne feramus. Deleamus, mutemus, expurgemus quamuis in uita recedant : nec tanti unum, uel alterum uersum faciamus, ut ordinem, & decorum parui pendamus, dummodo illum inseramus. Quoniam demonstrat hoc inopiam ingenij, & iudicij. Oportet poetam esse liberalem, nec nimis religiosum in mutando ; & delendo etiam, quae multo labore composuit. Nec uero semel hoc studium

dum limandi est adhibendum, sed saepius. Iuuat etiã audire sententiam eorum, qui in eo studio excellent, quoniam semper sumus meliores iudices in alienis, quã in nostris. Locutiones examinare adhibitis Lucretio, Virgilio, Catullo, Tibullo, & Horatio. Numeros adhibito in suo quoque genere principe poeta, decorum, et ordinem expendere ex arte Rhetorica, cetera suo item modo, & ratione. Hoc est, quod Horatius commendat tantopere ut nonum prematur in annum. Non quod illa mora, afferat quicquam absolutioni, sed quia erit tẽpus emendandi, expoliendique accuratius. Quemadmodum uero singula debeamus expendere, non erit ab re si eandem rem à diuersis poetis tractatam subiiciamus, ut qui superior, qui inferior fuerit uidere possimus, & quibus rebus id fuerit affecutus, ut nos ad illam perfectionem in componendo accommodemus, & in emendando quid examinare debeamus animaduertamus.

Qua ratione examinãda sint nostra poemata ueterum exemplo, caput uigesimumnonum;

**Q**uo facilius, & commodius perfectum epigramma componere queamus, & diligentiam expoliendi adhibere erit utilissimum conferre rem eandem à diuersis



diuersis poetis explicatam, ut quomodo hic assequatur decorum, qua in re ille fuerit mancus, intelligamus: ut in alienis erroribus cautiore efficiamur, et aliorum periculis faciamus de nostro ingenio periculum. Sic fiet ut animaduersis uirtutibus aliorum, et quorundam cognitis uitis prudentiores euadamus. Iuuat etiam studio attentare, an aliqua quae ueteres sunt complexi, melius dici potuerint; quod tunc inspicimus, ubi quasi Penelopes telam reteximus. Verbi gratia. Describat Virgilius tempestatem, describant alij eisdem numeris, & forma compositionis; certent inter se: adhibeamur nos iudices, canant ipsi inter se, nos ut Palaemon canentes audiamus. Incipit Virgilius in 1. Aeneidos.

Incubuerunt mari, totumque a sedibus imis  
 Vna Eurysque, Notusque; ruunt, creberque procellis,  
 Africus, & uastos uoluunt ad litora fluctus.  
 Insequitur clamorque uirum, stridorque rudentum  
 Eripiunt subito nubes, coelumque, diemque.  
 Teucrorum ex oculis ponto non incubat atra.  
 Intonuere poli, & crebris micat ignibus aether,  
 Praesentemque uiris intentant omnia mortem.

Audimus horrorem tempestatis non modo re ipsa, quae exponitur, sed numeris ad eam rem aptis, exquisitis dictionibus, litteris, & syllabis, nihil ut elegantius posset describi & ante oculos poni. Audiamus Ouid.

Cum

Cum mare sub noctem tumidis albescere coepit  
 Fluctibus, & praeceps spirare ualentius Eurus  
 Ardua iam dudum dimittite cornua rector  
 Clamat, & antennis totum subducite malum,  
 Hic iubet impediunt aduersae iussa procellae.  
 Nec finit audiri uocem fragor aequoris ullam  
 Hic rapit antennas, quae dum sine lege geruntur  
 Aspera surgit hiems.

Conferamus inter se hos duos eandem rem pingentes.  
 Non eo animo ut tam simus amentes, ut ueterum scri-  
 pta uelimus reprehendere, qui utinam aliquando possi-  
 mus satis admirari, praesertim ingeniosissimi poetae  
 Ouidij. Sed tamen quia nemo est tam exigui ingenij,  
 qui si duas res in eodem genere inter se conferat nesciat  
 statuere, utra praestantior sit, & excellentior: ut  
 possimus addiscere & bonos imitari utriusque carmina  
 expendemus. Nec uero mirandum erit, si cum de epi-  
 grammate agamus, Heroica carmina ad examinandum  
 proponamus. Nam cum in id semel incumbamus, ut  
 suis numeris absolutum epigramma qui fieri possit, ostē-  
 dere conemur: nec habeamus duos, qui epigramma cō-  
 posuerint eadem de re, & materia; ostendenda certe  
 fuit ratio in poetis recte imitandi, et emendandi nostra  
 iudicio, & ratione. Nam hinc facile perspiciemus, qua  
 ratione nostra possimus expolire. Quocirca nemo no-  
 strum

*strum hoc studium reprehēdat, nemo accuset industriā: Adbibemur iudices, feramus sententiam de re, nomen poetae subtrahamus in praesentia, ne manibus Ouidij iniuriam uideamur facere. Quamuis ille sane si uixisset, ut erat ingenio, & copia, singulari, ita certe iudicio, & consilio erat futurus solerti in emendando, quod ipse de se testatur.*

*Emendaturus si licuisset eram.*

*Ferat ergo Palaemon sententiam auditis duobus poetis, diuino altero, altero ingeniosissimo. Certe rem expendet Palaemon, & eo magis admirabitur illius cantum, quo magis attenderit: tantumque inesse in eo concentum, ut uix sonus huius audiatur: intelligit: illum tam esse cultum, proprium, concinnum, ut lucem huius praeripiat. In primis tempestatis principium non minax, languet potius, & iacet, albescit enim unda etiam minima tempestate. Hoc uero non uidetur stare posse recte, sub noctem coepit albescere, & iam dudum rector clamat. Aut dormiebant nautae aut imperium recusabant, qui alioqui minimo signo soliti sunt per foros cursitare. At illud quomodo cohaeret, modo coepit mare albescere, iam fragor impedit nautas ne uocem audiant: iam procellae illos retardant ne possint uela colligere: tam erant inexperti, ut illico redderetur amenes? Ibi alias ueretur spondeis ad tarditatem. Hic iubet*

bet impediunt aduersae inssa procellae : ut rem numeris significaret . Si hic rapit antennae , quomodo sine lege geruntur ? & quomodo aspera surgit hiems ? concinnior ille , uenustior , elegantior , non modo re , sed numeris , uerbis ipsis quot litteras caninas . R. ad illum horrorem , quot . s. ad sibilum quem uenti exprimunt : quid cum audimus .

Insequitur clamorq; uirum , stridorque rudentum . Nullum est uerbum ubi non sit . R. & uersus ipse pronuntiatu tempestatem ponit ob oculos ; nonne illud caelumq; diemq; exprimit uim tempestatis ? quid illud ponto nox concubabat atra . Ille uersus bis interruptus in monosyllabis cum collisione non significat illam intempestae noctis assiduam fulgurum iactationem interruptis nubibus ? Omitto reliqua ne sim multus . Lucanum eandem rem canentem audiamus libro quinto .

Inde ruunt toto concita pericula mundo  
 Primus ab Oceano caput exeris Atlanteo  
 Core mouens aestus , iam te tollente furebat  
 Pontus , & in scopulos totas erexerat undas .  
 Occurrit gelidus Boreas , pelagusque retundit ,  
 Et dubium pendet uento cui pareat aequor ,  
 Sed Scythici uicit rabies Aquilonis & undas  
 Torset , & abstrusas penitus uada fecit arenas ,  
 Nec perferit pontum Boreas ad saxa , suumque  
 In fluctus cori frangit mare , motaque possunt  
 Aequora subductis etiam concurrere uentis ,

M

Non

*Non Euri cessasse minas, non imbris atrum  
 Aeolij iacuisse Notum sub carcere saxi  
 Crediderim, cunctos solita de parte ruentes  
 Defendisse suas uiolento turbine terras,  
 Sic pelagus mansisse loco, nam parua procellis  
 Aequora rapta ferunt, Aegaeas transit in undas  
 Tyrrhenum, sonat Ionio uagus Adria ponto.  
 Ah quoties frustra pulsatos aequore montes  
 Obruit illa dies, quam celsa cacumina pessum  
 Tellus iusta dedit; non ullo litore surgunt  
 Tam ualidi fluctus, alioque ex orbe uoluti  
 A magno uenere mari, mundumque coercens  
 Monstriferos agit unda sinus.*

*Audiuimus canentem, iudicet ergo Palaemon an dignus  
 hic uitula, & ille. Rem ubi examinarit trutina aequa,  
 non dubito quin iudicet monstra potius cum peperisse,  
 quam partum formatum, suisque conflatum membris,  
 ordine, & ratione concinnum. Furere sene uidetur; non  
 currere, sine habenis efferri huc, atque illuc, nec posse con  
 sistere; nescit refecare siluescentes frondes, ut fructus ma  
 turescant, & colorentur suo sole, & decoro. Quae ino  
 pia ingenij est eadem saepius inculcare, nec uariare nomi  
 na: nec cohibere animi ardorem dummodo efferuescenti  
 cupiditati satisfaciat, in nugas delinere? quater paucis  
 uersibus inculcatur nomen pontus; bis repetitur Vox  
 Mare. quater aequora, ter pontus, ter Boreas, ter un  
 da,*

da, bis fluctus, ter pelagus, & alia, ubi Neptunus, ubi Doris, Thetis, Nereus, marmor, salum, fretum, Amphitrite, & cetera? Puderet bonum poetam tam breui spatium interiecto toties eadem nomina repetere. Quanto breuius ille rem amplificat, ut magis exaggerari non possit; hic dum uult extollere imminuit. Quam inepte tot hyperbolas: quam ridiculum illud de incredibili inundatione. Quae, & quanta repugnantia in dictis? Durum sane coercetur à molliori? Quae insania Corum opponere Boreae? qui enim retundit Boreas pelagus motum à Coro? Nam uterque adiacet septentrioni: Boreas quidem à latere uersus exortum solis: Corus uero à latere eiusdem uersus occasum. Itaque quicumque eorum impellat fluctus, ab alio repelli non possunt. Maioribus subiungit minora. Dicit adeo extolli mare uentis, ut imbrem in nubibus accipiat, atque usque adeo efferri, ut hauriat pluuias antequam decidant; deinde addit, nubila tanguntur uelis. Quorsum sit Apostrophe ad Corum? quorsum illa tarditas in uento, quasi inuitus ueniat exeret Atlanteo? Quid hoc mouens aestas, deinde furebat pontus, & erexerat undas? Cui occurrit Boreas? ob quam rem pendet aequor dubium? An interea dum deliberat, cui debeat obtemperare, non est tempestas? quae uerba cum suis substantiuis quam humilia, quam non apta, nec propria; qui fieri potest, ut Tyrrhenum mare transeat an Aegaeum cum antequam illi coniungant sit aliud interiectum, aliudq;



sortitum nomen. Quae nugae sunt hae? qui numeri? sane si haec illa subtili balance uelimus expendere hominis amentis esse potius putabimus, quam boni poetae; & eius qui dum gloriolam uult aucupari, ambireque famam admirantium quorundam, colligat stultitiae suae testes. Vides igitur quantum intersit inter compositionem illius, & huius congeriem, & aceruum rerum. Disce hac ratione superflua amputare, in rebus tibi non contradicere, non ponere repugnantia, non amplificando maioribus minora subiungere, non contraria, non inculcare uoces easdem, non improprie loqui, non refarcire quibuscunque uerbis uersum; sed decore omnia, ita ut unum uerbum si tollas aut mutes corruat (&) canor ille uersus, & sententia infringatur. Vocemus alio nomine in iudicium iterum Virgilium alia in causa, & re illi conferamus alios in eadem materia, ut qui ille excellat, alij sint inferiores uidere possimus, & ad eam praestantiam nostra epigrammata accōmodare. Libro tertio Georgico. de Tauro sic Virgilius.

Pascitur, & magna silua formosa iuuenca,  
 Illi alternantes multa ui praelia miscet  
 Vulneribus crebris, lauit ater corpora sanguis;  
 Versaque in obnixos, urgentur cornua, uasto  
 Cum gemitu reboant siluaeque & magnus Olympus.  
 Nec mos bellantes una stabulare; sed alter  
 Victus abit, longeque ignotis exulat oris  
 Multa gemens, ignominiam, plagasque superbi

Victoris,



Victoris, tum quos amisit inultus amores :  
 Et stabula aspectans regnis excessit auitis .  
 Ergo omni cura vires exercet, & inter  
 Dura iacet pernox instrato saxa cubili  
 Frondibus hirsutis, & carice pastus acuta :  
 Et tentat sese : atque irasci in cornua discit ,  
 Arboris obnixus trunco, uentos que laceffit  
 Jectibus : & sparsa ad pugnam proluit arena .  
 Post ubi collectum robur, vires que receptae :  
 Signa mouet , praeceps oblitum fertur in hostem .  
 Audire licet canentem iam Lucanum eadem de re  
 in libro secundo .

Pulsus ut armentis primo certamine taurus ;  
 Siluarum secreta petit , uacuos que per agros  
 Exul in aduersis explorat cornua truncis .  
 Nec redit impastus, nisi cum ceruice recepta  
 Excussi placuere tori, mox reddita uictor  
 Quoslibet in saltus comitantibus agmina tauris ,  
 Inuito pastore trahit . -----  
 Audiamus duos alios poetas eandem rem canentes, qui-  
 bus auditis facile erit cognoscere , quis eorū modulatus,  
 & dulcius canat, & naturae rei accommodatius . Statius  
 in libro secundo Thebaidos , sic .

----- Veluti dux taurus amata  
 Valle carens, pulsum solito, quem gramine uictor  
 Jussit ab erepta longe mugire iuuenca :

Cum

Cum profugo placuere tori, cervix quæ recepto  
Sanguine magna redit: fractæque in corpore vires;  
Bella cupit; saltus quæ & capta armenta reposcit.  
Jam pede, iam cornu melior. pauet ille reuersum  
Victor: & attoniti uix agnouere magistri.

Audiamus mox Valerium Flaccum libro secundo  
Argonauticon.

— qualis per pascua uictor: —  
Ingreditur, tum colla tumens, tum celsior ore  
Taurus, ubi assueti pecoris stabula alta reuifit,  
Et patrium nemus, & bello quos ulius amores.  
Nescio qui sonus, & qui concentus remaneant in auri-  
bus illius primis carminibus, ut etiam auditis his, non ef-  
fluxerit illa armonia. An quia ille rem intuitus, & natu-  
ram tauri melius cantum accommodarit rebus ipsis? An  
quia uepustius, & concinnius singula sit complexus? An  
quia sincerius loquitur, & proprius? An quia numero-  
sior illius oratio quaesito modis ipsis decoro? An quia  
ita suis omnibus absoluta numeris nihil nec mens in re,  
nec aures in concentu requirant? Illa mihi ita iucunda  
uidentur ut spiritu suo, & succo sese insinuent in animu,  
influant, delectent. Ubi audio Lucanum languidum ne-  
scio quid sentiunt aures, & frigidum; Deinde pingue  
sane sonans, ut qui enim fieri potest ut taurus uictor co-  
mitetur alios tauros, at illud ceruice recepta nescio an pro-  
prie dicatur. Statius hunc imitatus multa uerba illius  
transu-

transulit, quo rem deterius persequeretur. Flaccus sane melius, quia magis accedit ad maiestatem Virgilianam: sed tamen longo interuallo superat ille taurus hos tenuibus viribus iuuenos. Quoniam, & mature omnia, & d-core profert, uerba propria; res naturae consentaneas, numeros idoneos, stilum dicendi non alienum; non effutit quidquid in buccam uenit, sed quid rei conueniat, & loco attendit. Faciamus periculum alia in re, ut melius intelligatur hoc, quod uolumus, ut totum hoc negotium absoluiamus. Virgilius de quo libro tertio Georgico.

Continuo pecoris generosi pullis in aruis

Altius ingreditur, & mollia crura reponit

Primus, & ire uiam, & fluuios tentare minaces

Audet, & ignoto sese committere ponto,

Nec uanos horret strepitus; illi ardua ceruix;

Argutumque caput, breuis aluus, obesaque terga,

Luxuriatque toris animosum pectus; honesti

Spadices, glaucique. & mox.

--- Tum si qua sonum procul arma dedere

Stare loco nescit, micat auribus, & tremit artus,

Collectumque premens noliit sub naribus ignem

Densa iuba, & dextra iactata recumbit in armo.

At duplex agitur per lumbos spina canatque

Tellurem, & solido grauitur sonat ungula cornu

Et mox.

Jamque humiles, iamque elati, sublime uidentur

Aera

*Aera per uacuum ferri, atque assurgere in auras,  
Nec mora, nec requies ---*

Lucanus in quarto.

*Quippe ubi non sonipes motus clangore tubarum  
Saxa quatit pulsu, rigidos uexantia frenos  
Ora tenens, spargitque iubas, & surrigit aures  
Incertoque pedum pugnat non stare tumultu.  
Fessa iacet cervix, fumant sudoribus artus,  
Oraque proiecta squallent arentia lingua,  
Pectora rauca gemunt, quae creber anhelitus urget,  
Et defecta grauis longe trahit ilia pulsus,  
Siccaque sanguineis durefcit spuma lupatis.  
Iamque gradum neque uerberibus, stimulisque coacti,  
Nec quamuis crebris iussu calcaribus addunt.*

Silius Italicus in libro decimo.

*Sic ubi prosiliit Pisæo carcere praeceps  
Ante suos it victor equus, curritque per auras  
Non solum ante alios, sed etiam (mirabile dictu)  
Haud ulli durant uisus aequare uolantem.*

Claudianus in Nuptijs Honorij.

*Nobilis baud aliter sonipes, quem primus amoris  
Sollicitauit odor, tumidus, quatiensque decoras  
Curuata ceruice iubas Pharsalia rura  
Peruolat, & notus tinnitu flagitat annos  
Naribus accensis, mulcet secunda magistros  
Spes gregis, & pulchro gaudent armenta marito.*

Primus,

Primus, & ultimus hic aures demulcent magis  
 quam illi duo intermedij: certe quia inest in illorum  
 cantu aliquid, quod & animum iucunda rei exposi-  
 tione excitet, & aures suavi concentu recreet, & in-  
 timos sensus influat. Ac de Virgilio nemo dubitat  
 quin hoc, & in quouis certamine, ut generosus equus  
 palmam reportet, qui iam metas absolutionis totius  
 contingat, cum alij ne dum carceribus egrediantur,  
 ut uere sit ille generosus equus, de quo ipse tam suavi-  
 ter canit.

Famque humilis, iamque elatus sublime uidetur.  
 Aera per uacuū ferri atque assurgere in auras.

Nec mora, nec requies.

Ita rebus accommodat ingenium, ita numeris utitur  
 idoneis, uerbis proprijs, locutionibus in rem aptis,  
 nihil ut requiras. At Lucano si Dij qualem dederunt  
 mentem, dedissent facultatem praeclare certe cum bo-  
 no, & sonora quaedam amante poeta actum esset.  
 Sed unum illud non probabit, qui legerit Virgilium,  
 peregrinitatem quandam, & sermonis quasi quandam  
 improprietatem, qui quatit saxa, quomodo ferit ora  
 uexantia frenos, quid pugnat non stare tumultu pe-  
 dum, quid subrigit aures, & spargit iubar, & fes-  
 sa iacet ceruix. Quid illud ora proiecta squalent aren-  
 tia lingua, hoc diceret de cane in medio calore solis,

N

& di-

quae dissonant, nec numerorum legibus quadrant,  
nec concinne dicuntur, oblitera, muta, adde, deme,  
uerte, expende, & male formatos redde iterum in-  
cudi uersus, nihil nisi perfectum ama: Cetera con-  
temne.

Quomodo explicari debeat res uel iam ab  
alijs tractata, uel noua, caput

trigesimum.

**Q**Uod aliquid praeclarum in arte poetica sunt af-  
secuti omnes sese ad imitationem composuerunt:  
sed duo illa requiruntur ars, & natura, ut Horatius  
admonet in arte poetica; quoniam nec studium sine di-  
uite uena, nec rude quid prodest ingenium. Utraque  
res coniuncta uberrimos fructus affert. Si enim  
Zeuxis ille Heracleotes dum Crotoniatis Helenam  
uult effingere, quo uenustiore formaret, plures uir-  
gines unum in locum uoluit conuenire, ut ex quali-  
bet aliquid praeclarum in imagine sua imitaretur,  
aequum certe est nos illos naturae optimos opifices imi-  
tari, ita tamen, ut quid deceat uideamus. Est imita-  
tio studium quoddam comparandi similitudinem ex-  
cellentium scriptorum: sed hanc nolo seruitutem esse,  
nihil ut possis de tuo addere: quoniam hac ratione ni-

N 2 hil



hil admiratione dignum unquam efficies. Volo in studio cum ueteribus curras, sed nolo ut pedem ponas in eorum uestigijs; quia nec praeuenientem consequeris, nec palmas reportabis unquam. Et de ijs, qui tunc seruituti sunt addicti est accipienda illa Horatii sententia.

O imitatores seruum pecus.

Quod etiam significat in arte

Nec desilies imitator in arctum

Sed ex alia parte non ita tamen naturae facultatem euagari sines, ut omnia de tuo parum, aut nihil imitando alios componas. Sed serua hanc legem. si traueris aliquid ab alijs poetis iam explicatum, dabis diligenter operam, ut non fumum ex fulgure, sed ex fumo dare lucem cogites: elabora omni animi contentione, ut illis splendorem adiungas, tenebras non offundas; adde uenustatem, elegantiam, numeros, alioqui non aggrediaris sed nouam materiam assume. Vide quemadmodum Virgilius tractet eandem rem ab alio poeta, non modo Graeco, sed Latino tractatam, nec tamen det fumum ex fulgure: sed cum omnium iudicio sit Valerius Catullus, ut quam maxime cultus, longo tamen interuallo superatur a Virgilio in eare, in qua hic illum est imitatus. Nam Catullum imitatus Virgilius in quarto. certe uixit Ariadnae namque lamentum exprimit in sua Didone, sed



sed quanto elegantius, quanto prudentius, quod ex  
utroque tu facile conijcies. Sic Catullus in carmine  
de nuptijs Pelei, & Thetidos, introducit Ariadnam  
accusantem Theseum.

Siccine me patrijs abductam perfide ab oris  
Perfide deserto liquisti in littore Theseu.  
Siccine discedens neglecto numine Diuum  
Immemor ab deuota domum periuria portas?  
Nulla ne res potuit crudelis flectere mentis  
Consilium? tibi nulla fuit clementia praesto.  
Immite ut nostri uellet miserescere peccus  
At non haec quondam blanda promissa dedisti  
Voce mihi; non hoc miseram sperare iubebas,  
Sed connubia laeta, sed optatos Hymenaeos  
Quae cuncta aerij discerpunt irrita uenti.  
Tum, iam nulla uiro iuranti femina credat.  
Nulla uiri speret sermones esse fideles  
Qui dum aliquid cupiens animus praegessit apisci,  
Nil metuunt iurare, nihil promittere parcunt.  
Sed simul ac cupidae mentis satiata libido est,  
Dicta nihil metuere, nihil periuria curant.  
Certe ego te medio uersantem turbine leti  
Eripui, & potius germanam amittere creui  
Quam tibi fallaci supremo in tempore deesse.  
Pro quo dilaceranda seris dabor, alitibusque  
Praeda,

Praeda, nec iniecta tumulabor mortua terra.  
 Quae nam te genuit sola sub rupe leena?  
 Quod mare conceptum spumantibus expuit undis?  
 Quae syrtis, quae scylla uorax, quae uasta carybdis?  
 Talia qui reddis pro dulci praemia uita,  
 Si tibi non cordi fuerant connubia nostra,  
 Saeva quod horrebas prisca praecepta parentis:  
 Attamen in uestras potuisti ducere sedes,  
 Quae tibi incundo famularer, cerna labore.  
 Sed, quid ego ignaris nequicquam conqueror aruis  
 Externata malo, quae nullis sensibus auctae  
 Nec missas audire queunt, aut reddere uoces.  
 Ille autem prope iam medijs uersatur in undis:  
 Nec quisquam apparet uacua mortalis in alga.  
 Sic nimis insultans extremo tempore saeva  
 Fors etiam nostris inuidit questibus aures.  
 Iupiter omnipotens, utinam nec tempore primo  
 Gnosia cecropiae tetigissent litora puppes.  
 Indomito nec dira ferens stipendia tauro  
 Perfidus in Cretam religasset nauita funem.  
 Nec malus hic celans dulci crudelia forma  
 Consilium nostris quaesisset sedibus hospes.  
 Nam quo me referam? quali spe per dita nitari?  
 Isthmeneos ne petam montes? At gurgite lato  
 Discernens patriam truculentum diuidit aequor.

An patris auxilium sperem? quem ne ipsa reliqui,  
Respersum uiuerem paterna caedo secuta.  
Coniugis an fido consoler memet amore?  
Qui ne fugit lentos incuruans gurgite remos?  
Praetereo litus, nullo sola insula tecto.  
Nec patet egressus pelagi cingentibus undis:  
Nulla fugae ratio, nulla spes; omnia muta,  
Omnia sunt deserta: ostentant omnia letum.  
Non tamen ante mihi languescent lumina morte,  
Nec prius a fesso secedent corpore sensus,  
Quam iustam a Diuis exposcam prodita multam.  
Caelestumque fidem postrema comprecer hora.  
Quare facta uirum multantes uindice poena  
Eumenides, quibus anguineo redemita capillo  
Frons expirantis praeporat pectoris iras,  
Huc huc aduentate, meas audite querelas:  
Quas ego ue miserae extremis proferre medullis  
Cogor inops, ardens amenti coeca furore,  
Quae quoniam uere nascuntur pectore ab imo,  
Vos nolite pati nostrum uanescere luctum:  
Sed quali solam Theseus me mente reliquit,  
Tali mente Deae funestet seque, suosque.  
Haec Virgilius intuitus Didonem suam in Ae-  
neam ita loquentem introducit.

Possē nefas? tacitus quē mea decedere terra?  
 Nec te noster amor, neque te data dextera quondā,  
 Nec moritura tenet crudeli funere Dido?  
 Quin etiam hiberno moliris sidere classēm?  
 Et medijs properas Aquilonibus ire per altum.  
 Crudelis, quid? si non arua aliena, domos quē  
 Ignotus peteres, & Troia antiqua maneret?  
 Troia per undisonum peteretur classibus aequor.  
 Me ne fugis? per ego has lacrimas, dextrāq; tuā te  
 Quando aliud mihi iam miserae nihil ipsa reliqui.  
 Per connubia nostra, per inceptos Hymeneos  
 Si bene quid de te merui, fuit aut tibi quidquam  
 Dulce meum, miserere domus labentis, & istam  
 Oro (si quis adhuc precibus locus) exue mentem  
 Te propter libycae gentes, Nomadumquē Tyranni  
 Odere, insensū Tyrij te propter eundem;  
 Extinctus pudor, & qua sola sidera adibam.  
 Fama prior, cui me morientem deseris hospes?  
 Hoc solum nomen quoniam de coniunge restat.  
 Quid moror? an me Pygmalio dum moenia frater  
 Destruat, aut captam ducat Getulus Iarbas?  
 Saltem si qua mihi de te suscepta fuisset  
 Ante fugam soboles: si quis mihi paruulus aula  
 Luderet Aeneas, qui te tantum ore referret,  
 Non equidem omnino capta, aut deserta uiderer

Nec

Nec tibi Diua parens, gn̄is, nec Dardanus auct̄or  
 Perfide, sed duris genuit te cautibus horrens  
 Caucasus, Hyrcanaeque admorunt ubera tigres.  
 Nā quid dissimulo, aut quae me ad maura referuo?  
 Num fletu ingemuit nostro? num lumina flexit?  
 Nū lacrimas uictus dedit, aut miseratus amātē est?  
 Quae quibus anteferā? Jam iā nec maxima Iuno,  
 Ned saturnius haec oculis pater aspicit aequis.  
 Nusquam tuta fides, eiectum litore egentem  
 Excepi, & regni demens in parte locaui,  
 Amissam classem, socios a morte reduxi  
 Heu furijs incensa feror, nunc augur Apollo,  
 Nunc lyciae sortes, nunc & Jove missus ab alto  
 Interpres Diuum fert horrida iussa per auras.  
 Scilicet is superis labor est, ea cura quietos  
 Sollicitat; nec te teneo, neque dicta refello.  
 I, sequere Italiam uentis, pete regna per undas.  
 Spero equidem medijs (si quid pia numina possunt)  
 Supplicia hausurum scopulis, & nomine Dido  
 Saepe uocaturum; sequar atris ignibus absens.  
 Et cum frigida mors anima seduxerit artus  
 Omnibus umbra locis adero, dabis improbe poenas.  
 Audī, & haec manes ueniet mihi fama sub imos.  
 Multa alia deinde subiungit uenustissime, quae tu  
 leges in quarto, ut intelligas quomodo imitari debet,

dum eandem rem tractas, quam tractarunt iam ante te alij ueteres poetae. Maro certe nihil est aggressus, in quo non haberet, quem imitando sequeretur ducenti, ac ideo eam laudem est consequutus, ut et si Theocriti Siculi poetae non potuit assequi sales, acumen, uim, superarit tamen longo interuallo Hesiodum, Homero de par potius fuerit, & aequalis, quam inferior. Nihil ego sane puto esse causae cur Ouidius Naso singularis ingenij, & copiae uberrimae uir, non singularem tamen fuerit consecutus in scribendo gloriam; nisi quod tantum naturae suae indulgere uoluit, ut nimia eius copia tãquam extra ripas disfluere, quae certe poetarum bonorum imitatione fuit coercenda, ut pares fructus opinioni de se concitatae afferret. Si aggressus fueris genus componendi nouum, uide qui poetae ueteres adipiscantur laudem compositionis, & ijs utere legibus in tua scriptione, aut non dissimilibus. Abstinebis a fabulis in epigrammate quantum fieri poterit: quoniam in antiquis nullus iam est lepor: in nouis quia ignotae odium potius. Pro fabulis sint sententiae dulces, graues, nouae, iucundae, placidae, non languidae, non affectatae, non uicinis frequentes. Illas dum numeris includis adhibe iudicium. Paruas sententias numerorum genere include paruo, maiores Elegiaco, siue Heroico uersu, & sic de ceteris. Ne inferas



*seras uoces sine iudicio, uel si uenustae, uel si sint peregrinae, uel poeticæ, alio flexu, quam boni poetæ, uel sæcula politiora adhibuerunt.*

*Haec habui de hoc ornatissimo poematis genere dicere; nec quidquam aliud in presentia uenit in mentem quod in rem esse uideatur; quæ si utilia sint litterariæ familiae, tibiq; Rex optime et potentissime non ingrata futura; id sane in meis rebus secundis adnumerabo; agamq; immortalī Deo gratias immortales, cuius ope cogitationes nostræ nituntur magis, quam ulla facultate mea. Quod si utiliora cuiquam in mentem uenerunt de toto hoc genere eum ego oratum, obtestatumq; uolo, ut quæ nos non potuimus ob ingenij inopiam assequi, ipse utilitati communi consulens, & hæc emendet, & sua det in lucem. Nos enim utilitatem, non laudem spectamus.*

FINIS.









